

東

華

續

錄

臣朱壽朋敬編

臣潘鴻鼎恭校

光緒八年壬午春正月戊子朔寅刻 上詣 奉先殿行禮已刻詣 大高殿 薄皇殿行禮○己丑諭

恩福等奏特參知縣虧短交代請革職拿問查抄備抵一摺奉天候補知縣馬承恩在署遼陽州任內虧短庫欸銀三千二百六十四兩零米價銀一萬五千五十兩零攤欸等項銀九百五十三兩零在署錦縣任內虧短攤賠各欸銀一千九百四十六兩零歷經勒催迄未完繳實屬玩延馬承恩著即革職拿問交崇綺等提集該員各任內經手丁書訊明是侵是挪按律懲辦一面將寓所財庫密查抄並咨安徽巡撫將該員原籍家產查封備抵以重帑項○劉長佑等奏准部咨光緒七年閏七月初二日奉 上諭給事中劉瑞祺奏各省抽釐設卡請飭極衡出入酌量撤留一摺各省抽收釐金疊經諭令核實辦理如該給事中所奏情形實屬無裨國計著各該督撫將各釐卡出入數目悉心總核酌量撤留報部備查不得以空言塞責將此通諭知之欽此恭錄咨行到 仰見 皇太后 皇上聖慮周詳勤恤民隱詭讀之下感悚莫名當即欽遵轉行查辦去後茲據雲南釐金總局司道詳稱查滇省釐金開辦之初因邊徼遼闊

山路分歧所設盤卡凡七十餘處迨復疊奏清查凡無濟於餉有累於民者概從裁汰此外或撤分局以
派巡卡或併近局以資兼收現計共只存局二十五處分布于十四府八十五屬州縣之地均只能扼其
要衝至歷年各局收支銀數並設局處所委員銜名自同治十三年及光緒元年定章後均經按年造冊
報部在案現在各局抽收尙能照章並無弊竇局卡亦爲數無多應請暫仍照常辦理等情具詳請奏前
來臣等擬加察核尙屬實在情形查滇省陸路抽釐核計收數尤較各省減少且臣等疊次欽遵諭旨
已將各局處所及收支銀數歷年報部有案其零星盤金亦已疊示禁革滋弊委員並疊經分別撤參年
來辦理尙皆核實第以二十五局分布全省固未能杜奸商繞越已足舒生計於貧民局所既屬無多需
用現方孔亟自應暫仍其舊俾得挹注有資臣等仍當察度情形如有可撤之處仍卽隨時裁汰總期無
累商民有裨庶務以仰副訓諭股肱之至意報聞○裕祿奏皖省候補人員仍形擁擠請再展停分發
一年下吏部知之○庚寅上諭大高殿祈雪○辛卯諭職福等奏軍臺廢員由配脫逃請旨飭緝懲
辦一摺廢員甫清節賊由配脫逃難保不潛行來京或逃回原籍著步軍統領衙門順天府五城御史
及山東巡撫一併嚴拿務獲解部訊辦○諭謙禧等奏軍臺廢員由配脫逃請旨飭拿並將管站各員嚴
處一摺廢員全脫散由配脫逃難保不潛行來京或擅自回旗著步軍統領衙門順天府五城御史古

林將軍一體嚴拿務釋解部訊辦管站部員理藩院郎中崇壽筆帖式文瑞於雙全脫逃時漏未呈報殊屬顛預均著交部分別議處○李明墀奏洞庭一湖爲東南巨浸周圍八百餘里水落之時尙有沙洲間隔分爲東西兩湖春夏水漲則合而爲一萬頃汪洋茫無涯涘行旅視爲畏途東湖危險之處以九馬嘴爲最每遇暴風波濤洶湧往來舟楫覆溺無算從前特設鹿角救生局專收九馬嘴一帶浮屍每歲多至三四百具其附近地段有所謂折船廠萬人堆救命港等項名目具職志乘一切悽酷艱危之狀如在目中至進西湖面寬廣尤倍東湖爲雲貴兩省及常德等屬水路要道舟行必須橫截湖心而過三百里內無停泊之處猝遇狂風束手待斃又其地水勢停蓄冬令嚴寒易致冰凍往往船爲冰阻進退兩難或食盡而冰未開或竟有全船餓斃者故東湖危險在春杪以速秋卸西湖則並及冬盡春初伏查雍正九年仰蒙 世宗憲皇帝詳考圖志洞悉情形特降 諭旨發給營田水利項內平餘銀二十萬兩交前湖廣督臣邁柱湖南撫臣道宏恩於西湖適中之舵桿洲建築石壩並於四面建堤各數十丈悉用堅石砌成以爲行舟避風之所壘上立營房以駐汛兵立店房以便貿易風起則趨避有地潯泊則防護有資冰凍則接濟有賴 天恩高厚至今感戴不忘惟茲時湖中風波搖撼車輿以後不及大加修培以致日就傾圯僅存亂石冬令水涸尙可藉以泊舟而營房店房均經坍塌深夜多盜賊之虞膠淺無薪米之恃若值

湖漲水高既難停泊而亂石隱伏水中舟行尤多攔礙之患蓋一歲之中失事者幾難以數計也查東湖九馬嘴光緒四年經紳商人等稟請於山後別開新河使上游船隻可以直趨鹿角山萬石湖入新河以達九馬嘴之北下游船隻一過扁山亦可稍依湖岸入新河繞出九馬嘴之南中間一段險地全行避去數年來河開之後九馬嘴以下竟未損壞一船鹿角救生局起獲浮屍比前不及十分之一此項工程半由紳商人等捐資辦理現已一律告竣極著成效嗣後遇有淤墊祇須設法籌款隨時疏濬以爲經久之圖其西湖舵桿洲應修工程也於五年冬到任後即經派員前往履勘查明得石僅有其半湖身淤墊入土頗深勢須多購石料加高砌築方可有裨以時方開濬九馬嘴新河力難兼營並舉且計工費甚鉅湖省物力有限必須九馬嘴釀事後合湖南北兩省之力設法通籌集成巨款方可接續興辦茲新河幸已竣工微臣適交卸在卽深念此項工程攸關於民生利病甚大未敢以事非己責緘默不言應請 勅下湖廣督臣暨新任湖南撫臣會商籌款遴派委員估勘修築成此要工庶 先朝良法美意有粵莫之廢而商旅往來益沾利賴於無窮矣 上諭李明垣奏請飭修洞庭西湖舵桿洲要工一摺洞庭湖東南巨浸船隻往來向稱危險經李明垣於東湖九馬嘴地方別開新河以避風浪商旅稱便惟西湖舵桿洲堤工等項極關緊要亦應接續修整著李瀚章宗誠會同籌款勘估興修以重要工而利行旅○乙未

左宗棠奏 欽奉 恩命補授兩江總督兼充辦理通商事務大臣茲已馳抵江甯接篆任事竊維江南地廣事煩洋務尤關緊要臣以衰病之軀謬當斯任雖有生之日皆報 國之年而智慮難周深虞貽誤况親承 慈訓以得人而理藉分勞動為先尤當加意搜求聊資指臂之助竊見二品頂戴布政使銜湖南候補道王加敏公正廉明操履篤實與臣共事已久相知最深前委辦理臺局各務二十餘年事必躬親人言無間暨運使銜甘肅儘先補用道周崇傳品清望峻剛明耐苦操守之嚴實一時所僅見洵堪鎮浮式靡如蒙 俞允應請 旨飭下陝甘督臣催令該員等迅速前來俾資委用至王加敏所遺陝甘後路和臺官員接辦臣已臚商 欽差大臣督辦新疆軍務臣劉錦棠陝甘督臣譚鍾麟即就近札委現署湖北總督卞寶第接辦必能勝任無疑鄂臺諸務久經王加敏經理端緒可尋而徵臣既督兩江所有應協西征餉項暨老湘營專餉尤當盡力維持隨時摺注計可無虞掣肘 上諭左宗棠奏請調員差委一摺湖南候補道現辦陝甘後路糧臺王加敏甘肅儘先補用道周崇傳著劉錦棠譚鍾麟飭令該員等迅速前往江南交左宗棠差遣委用○丙申 上諭 太廟行禮○丁酉時享 太廟遣載勳恭代行禮○諭軍機大臣等翰林院侍講張佩綸奏瀝陳保小捍邊當謀自強之計一摺據稱江南形勢富先海而後江宜改長江水師提督駐吳淞口外狼山福山崇明三鎮均隸之專領兵輪出洋聚操實大臣以巡江兼

願五省真提督以巡海專顧一省移江南提督治淮徐轄陸路閩浙同一總督轄境宜改福建水師提督爲閩浙水師提督以浙江之定海海門兩鎮隸之浙江提督專轄陸路等語卽著左宗棠何璟彭玉麟等將海防事宜通盤籌畫會同妥議具奏○戊戌召維慶回京以鄂禮爲駐藏幫辦大臣○己亥雪○辛丑

上詣 奉先殿 壽星殿行禮○祈穀於 上帝遣醇親王代行禮○壬寅 上詣 大高殿 壽星

殿行禮○癸卯鄧承修奏自軍興以來財用匱乏加以水旱頻仍供億繁費會計之臣東羅西掘或害重而利微或損多而益少徵稅銀不遺尺帛於幣項無補絲毫海內虛耗百姓困苦蓋未有如今日者也夫天地生財祇有此數不在國則在民今庫款無一歲之儲閭閻鮮足食之家既不在國又不在民臣熟思其故博訪人言雖耗糜多端而其大要有二一曰內府之浮費一曰關稅之侵蝕浮費之弊諸臣已屢有陳奏久垂 聖鑒無俟臣言至於關稅侵蝕之弊十餘年來日增月盛殆不可以數計其見諸奏牘者如前任兩廣督臣劉坤一署理海關纔數月耳溢銀十餘萬兩其實缺之吏胥僕役又當併是可知柯玉棟一閱海關書吏耳不數年而家資巨萬捐納江蘇候補知府書吏如此則正在可知至津海關密邇近畿其在人耳目如傀儡遺過客供應上官歲須數萬金皆取償於此則飽入私囊車載而歸者可知他如上海登萊蕪湖漢口新關九江贛州廣州肇慶梧州歸綏道山海關凡有權稅者無不侵蝕多者十餘萬少亦

七八萬綜而計之歲不下數百萬今部臣糞維夜算欲額外求一錢辦公而不可得而坐視此數十百萬之民瘠民脂悉付狼吞虎噬而不問此臣所不解也且國家取民田賦而外祇有權稅所以裕國課民正供惟此二者而已然錢糧之分數卽州縣之考成有侵蝕者則監追參劾隨之其考核之嚴如此至於權稅則賊私入己繁數數百萬聞之如不聞見之猶不見譬如一家之中主持者日數鹽問米計及錫銖至於豪奴悍役僥剋其資財私鬻其田產而顧不之察有是理乎又不獨此也因其貨利以結納長官竊縫要路既以差而得富復以富而市官賄賂日彰官邪益著吏治何由不壞財用何由不竭臣愚欲乞特派大臣廉介如前侍郎彭玉麟精核如前撫臣丁日昌閱徹銘密查確數據實參奏並飭下各督撫所屬有關稅者妥議章程或於徵收溢額之中酌留一二以爲緩急辦公之用其餘諭令悉數解部年終開單呈覽以備稽核如有前項侵蝕情弊或督撫扶同隱匿別經御史糾彈一併從嚴治罪其差滿人員果有行方履潔盡公忘私者朝廷擢其一二以示獎異使賢者有所勸而不肖者有所懲裕國用而杜漏卮計無逾於此者或謂積痼已深一旦革之去一弊更生一弊窳一穴復開一穴浮收需索之害將更倍於曩時臣以爲此不必慮也臣之所慮者在於紀綱不振賞罰不行耳夫賈貨者人之情畏罪者亦人之情被見朝廷賞必信罰必行縱愛身家獨不愛性命耶昔齊威王爲政烹阿大夫封一卽墨

大夫而齊國大治轉移之權固操之自上耳我 皇太后 皇上誠大奮乾綱將天下可立治豈惟區區

積弊可除哉 上諭御史鄧承修奏請飭查關稅侵蝕以裕國用一摺前據戶部奏各省關稅有餘之處

除徵解足額外應令各就徵收實在情形按年溢解當諭令該督撫監督等核實辦理茲據該御史奏稱

關稅侵蝕之弊日增月盛不可數計甚至吏胥僕役中飽巨萬殊屬不成事體現在時事艱難需支絀

亟應事事力求核實以裨國計著管理關務之該督撫監督等各就徵收實在情形和盤託出遵照部章

於正額盈餘外按年溢解朝廷意存寬大亦不追其既往經此次嚴諭飭查後如再有掩飾迴護情弊別

經發覺惟該督撫監督等是問懷之○楊昌濬奏臣於光緒四年夏回奉 命幫辦甘肅新疆善後事宜

又於六年十二月內奉 上諭楊昌濬著會辦新疆善後事宜欽此當即欽遵辦理刊用木質關防以昭

信守在案茲查新任督臣蒞任後現駐省城與前督臣左宗棠督師出省駐紮前路情形不同所有新疆

善後似毋庸另派會辦以一事權俟 命下之日臣即將關防銷燬報聞○甲辰以京師得雪 上親詣

大高殿報謝○乙巳諭奕訢奏參委散秩大臣接班到廳請旨交部議處一摺禁禁城內值班例應辰

刻入直本月十七日委散秩大臣盛敬午刻始行接班殊屬不合盛敬著交部議處嗣後各處值班王大

臣務當遵照定章按時入直毋得稍涉曠誤致干咎戾○丙午諭巡視東城御史阿彥泰等奏請嚴懲倉

匪以重倉務一擱上年海運倉開放俸米有需案抑勒扣留等弊花戶趙永泉及劉二著刑部嚴訊確情按律懲辦並著步軍統領衙門順天府五城一體查拿張六卽張鳳儀解交刑部歸案審辦○戊申張樹馨等奏准刑部咨議覆御史胡隆洵奏請將盜案仍照舊例分別首從辦理一摺請旨飭下各省督撫將軍都統府尹體察地方情形迅速妥議具奏統俟臣部彙核辦理等因光緒七年閏七月二十五日奉本日奉旨依議欽此欽遵轉行妥議去後茲據廣東按察使龔易圖體察各屬地方情形核議詳請具奏前來等因伏查各省盜風之熾以粵東爲最甚先於同治二年間經前督臣毛鴻賓前署撫臣郭嵩燾縷晰陳奏欽奉 上諭廣東省廣州府屬及佛岡直隸同知拿獲匪犯仍行解省勘審外其距省較遠之各府屬州縣所獲拜會從逆拒敵官兵者及迭次行劫夥眾持械拒捕傷人罪應斬梟物決各犯由各該州縣審實後卽解送該管道府覆審錄供具詳該督撫審明情節確實卽飭令就地正法等因欽此又於同治十三年間該覆御史鄧慶麟奏飭令軍務肅清省分拿獲盜匪照例辦理案內經前撫臣張兆棟以盜劫之風尙未止息奏請仍照奏定章程就地明正典刑俾知畏懼等因覆奏奉旨刑部知道欽此欽遵各在案原因此等悍桀之徒往往明目張膽肆無忌憚不得不特設重典立予駢誅於辟以止辟之中仍寓刑期無刑之意現在各省軍務肅清盜風較靖誠宜次第規復舊制恪遵辦理以昭慎重惟是腹地

邊省情形各有不同因時制宜寬猛期於相濟近年來粵東所獲逆匪盜犯各就地方遠近或解省勘審
 或由該管道府搜勘錄供具稟皆係供認明確罪狀昭著始行批飭正法就地懲辦從未敢草率定讞致
 滋冤濫計自同治十三年間覆奏以來迄今又閱數年各處搶劫之風雖較前略為斂戢第華洋雜處山
 海錯綜熾悍成風一時終難猝變其間出沒重洋擄殺結拜會任意橫行甚至倚他族為護符踞山林
 為窟宅負嵎抗拒特眾逞兇如上年揭陽縣屬風吹寮各鄉匪徒出籠得等糾眾起旗謀為不軌一案幸
 該處地方文武查辦迅速得以消患初萌經將獲犯審辦情形奏報本年復有長寧會匪李沙婆七等結
 盟拜會潛謀起事亦據該地方文武擒獲首要匪犯多名現經批飭解道審辦容俟審明另行具奏此外
 惠州府屬民情頑梗搶劫械鬪相習成風先經奏明咨會善陸路提督臣蔡金章會同惠州府督飭所屬
 各州縣分別強鄉弱鄉酌量擇尤重辦現已議定章程正值開辦伊始伏莽則根株未盡匪鄉則搜捕方
 殷凡此巨懸積匪稔惡煽亂之徒董以嚴刑猶恐伺隙逞漏網逃誅苦遠改歸舊制逐一解省勘辦而
 外府州縣距省程途遠則千餘里少亦數百里不第長途押解罔固衆處固多意外之虞且恐各屬以解
 省需費賠以難支因而消弭諱飾貽禍養癰反為地方隱患臣等體察情形悉心斟酌當茲盜風未息捕
 務方殷之際勢不能不請從權宜以資整頓擬請嗣後除廣州府屬及佛岡直隸同知拿獲逆匪盜犯仍

行解省勘審外其距省較遠之各屬州縣拿獲拜會從逆及夥眾持械搶劫罪應即勘決各犯仍照奏
定章程訊明錄供解由本管道府覆訊明確稟由臣等核明批飭就地正法仍將決過人數按三箇月彙
報一次並逐案補具供詞咨部備案一俟伏莽全清盜風止息再行隨時奏請照得辦理下刑部知之○
庚戌諭劉長佑等奏請留道員暫緩引見並調員差委等語雲南補用道沈壽榕著准其暫緩引見坐補
迤西道陳席珍前任大理府知府李衍綬著吏部查明飭令該員等前赴雲南交劉長佑杜瑞聯差委李
衍綬並准其留於雲南補用○予江西德化縣孝婦黃劉氏旌表○丁寶楨奏三巖野番劫殺洋人一案
前經臣寶楨會同前署成都將軍臣托克湍附片具奏欽奉 上諭野番肆行劫殺實屬兇頑著丁寶楨
托克湍督飭派出官兵並嚴檄該地方等務將滋事首夥各兇番悉日拿獲追賊給領盡法懲辦不准稍
涉遲延致洋人有所藉口別生枝節等因欽此當經轉行該糧務委員等一體欽遵辦理去後並隨卽飭
令勒限嚴緝嗣成都將軍宗室臣岐元到任後又經會同嚴札飭催迅速安辦旋據委員知州楊榮打箭
爐廳同知李忠清巴塘糧務委員裕志文稟稱前經拿獲夾壩工布曲批策珠二名並起獲原贓騾馬等
件給洋人認明承領訊據工布曲批供稱是夜行劫有丁林寺喇嘛在內夥同搶劫當又設法將喇嘛降
巴納小殺熱根堆二名獲案提同工布曲批等質訊明確供認不諱並據隨同司鐸梅玉林之僱工聞天

順等認係當時爲首兇犯確切無疑雖餘匪在逃未獲而該四犯既據供證確鑿自應照章懲辦惟巴塘地方全係土番獲犯並無監卡可禁若令久稽顯戮不惟恐滋事端在洋人亦必藉口遲延別生枝節應請將情罪重大之工布曲批殺熟根堆二犯先行正法以昭炯戒其策珠降巴納小二犯即押回拘禁打箭爐編待質一俟納獲餘犯再行訊辦庶免狡展所劫各賊除起獲外據該教堂估計應賠銀一千九百三十五兩七錢一分惟此案雖係餘匪爲首而崑松工僧俗竟有多名在內夥劫又該處甲坪烏金澤旺本係藏人兩土司膽敢派令充當甲坪以致內勾外結出此重案是該巴塘正副土司與丁林寺堪布約東不嚴均難辭責所有前項贓銀應飭令巴塘正副土司暨丁林寺堪布分別賠繳以爲約束不嚴者戒該教主畢天榮見如此辦理兇犯既經正法失職亦復有羞心極悅服毫無異議當經領銀出具洋字斷記了案切結以憑結案等情具報前來等查該員等辦理此案甚爲妥速並取其該教主畢天榮了案切結尤爲結實可靠惟三藏野番頗年攔搶行商上年並拒斃駐藏幫辦大臣維慶引馬人夫賈屬兇頑此次又復劫殺洋人雖畢天榮自知理屈不與爲難俾得速爲結案而該匪等迭次越境搶劫滋事若不將此案逸匪悉數擊獲嚴行究辦實無以示儆將來現經批飭該糧員稽志文督飭該土司隨時購綫設法密捕務將在逃餘匪上緊弋獲盡法懲辦庶野匪稍知敏迹大道可期通暢仰副 聖主懷柔遠人綏

靖邊隅之至意下部知之○辛亥以福銀爲兵部左侍郎岳林爲理藩院右侍郎○以景瑞爲正黃旗滿洲副都統貴恆爲正白旗蒙古副都統維慶爲正紅旗漢軍副都統○調李鴻藻爲吏部尚書以毛昶熙爲兵部尚書閻敬銘爲戶部尚書畢道遠爲左都御史游百川爲倉場侍郎周家楣爲順天府尹○以李鴻藻充武英殿總裁○周恆祺以病免以慶裕爲漕運總督倪文蔚爲廣西巡撫徐延旭爲廣西布政使○賞加李慎副都統銜作爲西甯辦事大臣○以桂琦爲馬蘭鎮總兵兼總管內務府大臣○諭朕奉慈福端佑康頤昭豫莊誠皇太后懿旨三載考績爲國家激揚大典中外滿漢諸臣有能格共職守勞績最著者允宜特加甄敘其有平庸衰老者亦難曲予優容茲當京察屆期吏部開單題請詳加披閱恭親王首贊樞廷殫心輔弼機宜妥協懋著勳勞著交宗人府從優議敘大學士寶鋆協辦大學士兵部尚書調任吏部尚書李鴻藻戶部尚書景廉著戶部左侍郎王文韶同心贊毋克慎克勤均著交部議敘大學士直隸總督李鴻章任事實心才猷闳遠大學士兩江總督左宗棠勳績夙著勞瘁不辭前兵部右侍郎彭玉麟巡閱長江水師宣力有年任勞任怨均著交部從優議敘吏部尚書萬青藜屢被參奏衆望不孚戶部尚書董恂年力就衰均著開缺都察院左都御史童華在上書房行走有年精力未衰惟辦事不無疏懈著開缺以待郎候補仍在上書房行走兵部右侍郎恩麟理藩院右侍郎鐵祺才具平庸均著以

原品休致○諭御史御積誠奏請飭禁止接遞匿名書信等語匿名揭帖例禁嚴若如所奏近來投遞匿名書信不一而足甚至刊刻成書以絕無根據之詞肆口誣毀顛倒是非混亂觀聽於朝政大有關係若五城御史出示嚴禁嗣後如有向京員私宅投遞匿名書信者卽將來人送交刑部嚴行究辦以儆刁風○李鴻章奏請添設張獨多三屬學額下部議○李鴻章奏三品銜候選道徐建寅前於光緒元年五月經總理各國事務衙門奏保堪備出使外洋之選奉 旨依議欽此該員先在上海機器局歷練有年熟諳製造詞調赴山東總辦機器局二年十月經升任山東撫臣丁寶楨以該員綜核名實條理精詳奏懇 恩施錄用奉 旨著俟經手事竣送部引見欽此五年閏三月將東省製造軍火等事辦理完竣經山東撫臣文格給咨北上行抵天津適出使德國大臣李鳳苞奏調該員出洋充當二等參贊欽奉五年七月二十一日 寄諭著 旨飭令迅速起程前赴德國等因欽此當卽轉飭遵照並將原領山東咨文由 臣咨送吏部存查聲明俟回華再行給咨赴部在案該員在德二年因水土不服致病稟由李鳳苞批准銷差回華道出法國巴黎都城經出使英國大臣曾紀澤委令齎送俄國新換約本進京投遞該員於十月間回抵上海醫治病痊茲已來直隸由 臣照案給咨前來查該員徐建寅熟悉洋務於船廠製造之學研究尤精前由道銜候選郎中經丁寶楨奏保奉 旨送部因遵往德國充當參贊不克赴京該員曾在

督賑案內加捐道員並於閩廠生徒出洋肄業案內出力保加三品銜現既銷差回華自應以三品銜候
選道仍遵前奉 諭旨送部引 見候 旨錄用下吏部知之○壬子予湖南龍陽縣烈婦曾朱氏旌表
○乙卯諭給事中彭世昌奏請將陣亡之軍功查明優卹等語軍功何千珠李寶林晏繼周勵均著該部
查明從優議卹○銘安奏 奴才前以吉省應設民官甚多因本地籌款維艱勢難一齊舉辦先請添設資
州廳五常廳教化縣三處正印教佐等官當於光緒六年十二月初八日專摺具奏奉 旨飭部核准並
由奴才委員試署在案現在收取荒價勸辦斗稅又歷一年積有成數所有應行添設升改各缺自當及
時擬議請 旨遵行查雙城堡地方距省四百餘里為省城東北之門戶界外均有民官治理惟該堡與
拉林地方公事仍係旗員經營未免向隅奴才札派差委道顧耀熙前往查勘何處可以添官建署飭令
繪圖稟覆去後旋據該道稟稱遵查雙城堡在省城東北四百八十里本屬拉林屬地自嘉慶年間移撥
京旗設立村屯劃歸堡者東西相距一百三十里南北相距七十里四面仍皆拉林界現在堡城商賈雲
集戶口繁多較拉林為盛自應在該堡城內添設民官以資撫輯拉林但設分防足以佐治惟地界則當
併拉林所屬統歸雙城管轄方覺整齊東面本與阿勒楚喀以古城店分界古城店之東今屬賓州廳界
店西應屬雙城東南本與五常堡以莫勒恩河分界河南今屬五常廳界河北應屬雙城南面西面均與

伯都訥以拉林河分界河南河西爲伯都訥隸界河東北應屬雙城北面本與黑龍江以松花江分界
江北爲呼蘭隸界江南應屬雙城如此劃分雙城地勢實居拉林之適中爲省北之屏障形勢宏敞庶務
殷繁將來建立衙署監獄以及巡檢捕衙修造城垣祠廟均有隙地足敷布置第東南距拉林一隅有遠
在百里以外者尙恐鞭長莫及兼艱難周應請於拉林地方設立分防衙署緝捕之餘藉資佐理等語並
繪具地圖稟擬前來奴才前請在雙城堡拉林地方添設撫民通判分防巡檢等官並擬將堡城總管一
缺裁撤改設協領一員業經附片瀝陳仰蒙 諭允在案既據該道覆勘明確稟稱雙城堡商賈輻輳事
務殷煩亟須添設民官以資治理請仍照前奏在雙城堡設立撫民通判一員名曰雙城廳另設巡檢兼
司獄事一員管理監獄訓導一員振興學校拉林分設巡檢一員卽歸雙城廳統屬其雙城堡原設總管
一缺卽請裁撤改設協領一員專司緝捕及一切旗務除雙城拉林土屯一項照新設賓州五常各廳均
歸旗署徵解之例仍由雙城拉林旗署徵解外其餘一切租稅均歸新設民官徵收詞訟命盜案件均歸
民官審理以一事權此雙城堡拉林擬設廳官教佐各員之情形也又查伊通距省二百餘里爲省西最
要咽喉向歸吉林總管轄地方遼闊治理難周必須添設民官劃疆分治方能通聲教而輯人民奴才札
派差委道顧肇熙本任吉林總同知督慶前往查勘何處可以添官建署飭令繪圖稟覆去後旋據該道

等票勘得伊通河在省西二百八十里至威遠堡門二百七十里係奉天界北至長春廳一百餘里南至圍場荒地二百餘里爲長吉兩廳之門戶吉黑兩省之通衢前山後河中有大道勢極扼要當衝商賈雲集居民櫛比履勘周圍東西五里南北三里能於此修城建署並設倉庫監獄學署祠廟確於地理相宜民情協洽至於勘分界址止南至小伊通河七十里河南屬奉天界河北屬伊通正西至威遠堡門二百七十里門西屬奉天界門東屬伊通東南至那爾叫嶺二百四十里嶺南屬吉林嶺北屬伊通西南至黑瞎子背嶺三十里嶺南屬奉天界嶺北屬伊通西北至二十家子邊壕壕北屬奉天界壕南屬伊通正東自距伊通五十里之石頭河子分界河東屬吉林河西屬伊通東北自距伊通一百三十里之小河壘邊壕分界壕東屬吉林壕西屬伊通如此劃分似屬整齊惟伊通河設立有司衙門距圍場二三百里難期兼顧今勘得遼南一百六十里之磨盤山東西寬三里南北長五里前通當石河至輝發河入大江後靠椅子等山局勢寬平居圍荒之適中亦宜添設分防以輔其治伊通既擬添設正印官則所分界內倘有租賦自應均歸新設之員經徵除俟圍荒放竣後照例升科報部歸伊通徵租外所有石頭河子小河臺遼西遼南現擬於吉林府分界之處應徵地丁銀米約數在一萬零五百兩有奇均劃歸伊通經徵以期撫字催科實成並重惟吉林廳原徵賦額不過五萬兩有奇今遽劃出少半亦應設法籌補查圍場邊

荒前於咸豐同治年間先後放荒地十牌共地六萬七千三百餘晌現在該處正當勸丈併浮多計之約在十萬晌此項地畝每晌向收大租錢六百文小租錢六十文由戶司經徵而地屬吉林廳管轄遇有佃民詞訟事件均歸廳官管理如將大小租撥歸吉林府徵收實屬官民兩便等語並繪具地圖稟復前來奴才詳核該道等所稟各節均尙妥協卽請在伊通設立知州一員名曰伊通州該州舊有吉林分防巡檢一員改爲吏目管理伊通監獄添設訓導一員振興學校磨盤山分設巡檢一員卽歸伊通州統屬至勘分界址及經徵租賦審理詞訟自應悉如所稟辦理此伊通磨盤山擬設正印教佐各官之情形也夫新設各缺旣已措置咸宜治理可期一律而舊設三廳亦應變通盡利政教庶免兩歧溯查奴才前奏變通官制增設府廳州縣一摺奉到部咨內開該將軍請將吉林廳理事同知升爲府治改設知府原設吉林廳巡檢改爲府司獄管司獄事伯都訥原設理事同知改爲撫民同知原設孤榆樹巡檢兼管司獄事長春廳原設理事通判改爲撫民同知原設巡檢兼管司獄事農安添設照磨一員靠山屯添設分防經歷一員並據奏稱吉林三廳向因專管旗人戶婚各事皆用理事人員今民戶衆多政務殷煩與從前情形不同請與新設之同通州縣均加理事銜滿漢兼用等語等查該將軍所奏添設各缺及請加理事銜滿漢兼用之處自係因地制宜整頓吏治起見惟添設改設各缺總期官民相安方臻妥善請旨飭

令該將軍體察情形通籌全局詳細分別奏明辦理等因奉 諭旨依議欽此欽遵咨行前來伏思吉林廳理事同知駐守省垣幅輳遼闊管轄本屬難周且邇來荒地日闢民居日密戶婚詞訟命盜之案倍多於前只以同知獨任其事權輒重地廣事煩難免於顧此失彼之虞擬請將吉林廳理事同知一缺升爲府治改設知府名曰吉林府仍照熱河承德府奉天昌圖府之例仍管地面詞訟錢糧各事新設之伊通州歸其統屬並將原設吉林巡檢一缺升爲府司獄管司獄事學正一缺升爲府教授以符體制其吉林府應分界址東至張廣才嶺爲界計一百里外至改化縣東南至樹林子荒爲界外至官山西南至太陽川爲界計一百餘里外至伊通州西至石頭河子爲界計二百三十里外至伊通州西北至小河臺爲界計二百一十里外至長春廳北至法特哈邊門爲界計二百一十里外至伯都訥東北至舒蘭荒松字四牌爲界外至五常廳如此劃明疆界各專責成庶免互相推諉至伯都訥廳理事同知一缺照原奏改爲撫民同知加理事銜長春廳理事通判一缺毋庸升爲撫民同知請改爲撫民通判加理事銜農安地當衝要生聚日繁請照原奏添設分防照磨一員歸長春廳統屬靠山屯地方民戶無多該廳可以兼顧毋庸另設分防經歷此吉林舊設三廳擬請升改各官之情形也惟本年十月十一日接准吏部咨開以奉天現無理事同知通判員缺故有准用揀發曾任實缺正途不分滿漢補用明文該將軍請將吉林

理事同通三廳仿照奉天章程由揀發會任實缺止途不分滿漢酌量補用之處應毋庸議等因維時吉林設三廳尙未奏請升改均係理事同知通判格於成例是以吏部奏駁查奉天昌圖廳同知改爲知府請由外揀員升補與京理事通判改爲撫民同知亦請不論滿漢兼用均加理事銜照例將揀發人員請補均經部議奏准在案現在吉林廳理事同知升爲知府應請仿照奉天昌圖府之例由外揀員升補伯都訥應改爲撫民同知長春廳改爲撫民通判亦請仿照奉天興京撫民同知之例請仍由揀發會任實缺各員不論滿漢酌量補用庶與新設各廳縣統歸一律實於政治有裨下部議奏○丙辰諭廣壽等奏驗看月官查有冒名頂替情弊請飭部訊辦一摺摺納府經歷何璟縣丞張日焜從九品徐福壽經廣壽等查詢各該員履歷均不相符顯係冒名頂替吳璟張日焜徐福壽均著刑部訊明照例懲辦

二月丁巳朔祭 先師孔子廟遣靈桂行禮○戊午祭 社稷壇遣世鐸恭代行禮○己未朔 日於東

郊遣降勲恭代行禮○以江蘇長洲元和縣文廟失火飭江蘇巡撫查明看守不慎該管各官據實參奏交部議處並著籌撥款項迅速興修○諭御史英俊奏風聞戶部已滿書吏韓士傑卽韓仲敏孫際昌卽孫春圃把持庫務每至收發餉銀刁難勒索韓士傑於伊姪韓秀甫接充書吏後仍在身後辦事韓秀甫近來並不當差有伊戚史恩瀟朱貴卿朦混冒替嚇詐招搖工於作弊請飭查究等語庫儲重地豈容濫

役盤踞把持藉端勒索管理三庫事務大臣查明究辦以清積弊而重庫儲○庚申諭張之洞奏請調員差委等語翰林院編修王文錦著發往山西交張之洞差遣委用降調知府李秉衡著俟引見後再行請旨○諭前據裕祿奏調道員高崇基差委當經降旨允准茲據張之洞奏稱該員前在山西知縣任內尙有經手未完事件請飭前往清理等語著李鴻章飭令該員迅赴山西俟經手事件完結再行前赴安徽聽候差委○諭本年輪應查閱山東河南江蘇安徽江西五省營伍之期山東即派任道銜河南即派李鶴年江蘇即派左宗棠安徽即派裕祿江西即派李文敏逐一查閱認真簡校如有訓練不精軍實不齊者即將廢弛之將弁據實參奏毋得視為具文○恭鏗奏准護理陝甘總督楊昌濬移咨轉准刑部咨內開遵議御史胡隆洵奏請將盜案仍照舊例分別首從辦理一摺經該部奏請飭下各省督撫將軍都統府尹體察地方情形將夥眾持械強劫案件仍照成例分別題奏奉旨依議欽此欽遵咨照到營仰見皇上於欽恤刑獄之中仍寓內地制宜之意欽佩莫名奴才伏查辦理盜案就地正法本屬一時權宜如果地方安謐自宜規復舊章惟查烏魯木齊各屬遠處關外漢回雜處與內省本有不同值此地方新復莠民尙未革心不免乘間搶劫且各處游勇尙多以致盜案層見迭出非嚴捕立辦不足以昭炯戒而安善良若將就地正法章程遽行停止則辦一盜案動輒經年漏網者既逍遙法外弋獲者又不

能立懲匪徒無知且疑為盜尙有生理誠恐惡膽愈熾竄於整飭地方大有窒礙合無仰懇 天恩俯念

烏魯木齊各屬正當辦理善後之時准將就地正法章程暫行展限俟二三年後盜風稍息再由奴才酌

量情形奏請停止下刑部知之○古尼音布奏二月初二日有花翎侍衛兼公中佐領慶良親身到奴才

寓所承恩寺廟內求見彼時奴才出門未回慶良留有紅條書函一封內係奏參奴才嫁娶違制草書摺

底一紙內云去歲十二月間在國服期內娶第二孫婦公然發帖收受貨數萬又云奴才於光緒元年

九月娶長孫婦亦在國服期內飛帖打網商賈俱集賀敬一誤再誤無有知其干犯為之救正者文職三

品武職二品均降服一年停止筵樂將軍頭品大員任意妄為國服稱賀實係斂財若非明正紀綱從嚴

治罪法制何在等語奴才接見之下反復推詳慶良既將奏底遞看又於條內註明住處必有所因奴才

隨於初二日親往面晤慶良追問究是何人出名具此摺底慶良答云具奏之人不可明言又云奴才任

錦州約有積蓄此事伊已留緩必須酬謝了事各等語奴才聽聞之際不勝詫異惶悚之至伏思奴才原

籍在盛京省城南熊岳城駐防距省四百二十里去歲十二月十八日奴才姪孫在籍續娶彼時謹遵

遺詔國服禮節會典俱載直省官員卅年不作樂百日不嫁娶註載明晰始行迎娶再前於光緒元年九

月初三日奴才之孫在籍娶婦亦是敬謹查明在百日期外奴才雖愚身受 重恩豈敢違制竟在國服

其內娶婦稱實歛財擅自妄爲今奴才既知有人意欲參劾自應據實先爲陳明請 旨飭下盛京將軍
府尹確切查明奴才之孫姪孫前後娶妻時日是否在百日限外如有飛帖打網收歛商賈錢財情事卽
將奴才從嚴治罪情甘領認若果虛誣而慶良身充侍衛兼公中佐領似有應得之咎 上諭古尼音布
奏呈進將兩請旨查辦一摺據稱本月初二日有自稱侍衛慶良至伊寓所投遞職銜名帖並留書信一
封拆係奏底以國服期內爲其兩孫娶婦具摺參劾並面稱具摺之人不可明言伊已留緩必須酬謝了
事各情請旨查辦等語案關擅擬奏底希圖挾制訛案此風斷不可長著刑部查傳侍衛慶良嚴行訊究
務期水落石出按律懲辦以儆刁風古尼音布自請查辦之處並著刑部於定案時聲明請旨○景壽等
奏聞得各門均不免有越城之事該班弁兵畏其人多不敢捕獲如此因循日久視爲泛常恐犯法者無
人不可進城犯禁者無物不可偷運若不力求整頓其患甚大殊爲可慮擬請 飭下步軍統領於內外
城下如何分派營弁嚴密巡邏之處妥議章程具奏並請 飭下八旗查城大臣認真稽查如有偷越之
犯查明將該班官兵重懲不貸不得視為具文庶宵小潛蹤亦消盜之一助也 上諭景壽奏請飭步軍
統領分派營弁嚴密巡邏並飭查城大臣認真稽查等語據奏情形疏懈已極實屬不成事體所有城下
應行分派巡邏之處著步軍統領按照定章實力整頓並著查城大臣嚴飭城上該班官兵認真稽查如

再有偷越情事即將該管大臣及該班官兵等嚴行懲處不貸○癸亥奕譞奏光緒七年十二月十九日
欽奉 慈禧端佑康頤昭豫莊誠皇太后懿旨前據內閣侍讀學士文碩奏門禁宜嚴並變通大臣進班
章程各摺片著醇親王奕譞會同御前大臣等妥議具奏欽此十二月二十五日復欽奉 懿旨內閣學
士貴恆奏禁城內各處當差人等請飭詳定稽查章程各門馬道鎖鑰請歸班統領掌管御史陳啟泰
奏請飭查禁城內如有開設煙館賭局及容隱匪人情事即行拿辦各摺片著醇親王奕譞會同御前大
臣軍機大臣總管內務府大臣前鋒統領護軍統領歸入文碩前奏各摺片一併妥議具奏欽此遵即會
同王大臣將文碩等原奏公同商議意見相同除由王大臣等合詞覆奏外所有遵議緣由理合恭摺擬
陳奕訢等奏光緒七年十一月三十日內閣奉 上諭內閣侍讀學士文碩奏門禁宜嚴並請變通大臣
進班章程各摺片著御前大臣軍機大臣內務府大臣前鋒統領護軍統領會同妥議具奏欽此嗣據內
閣學士貴恆奏 禁城內各處當差人等請 飭詳定稽查章程各門馬道鎖鑰請歸班統領掌管御
史陳啟泰奏請 飭查禁城內如有開設煙館賭局及容隱匪人情事即行拿辦各摺片七年十二月
二十五日欽奉 慈禧端佑康頤昭豫莊誠皇太后懿旨命等一併妥議具奏等伏查 禁城重地
理宜嚴肅迭經申明定章認真稽察仍有閒雜人等混跡往來甚至有匪徒迭次偷竊情事亟應妥為籌

嚴實力整頓以昭慎重文碩等所奏各節不無可採臣等謹公同商酌分別條議為我 皇太后 皇上
一一陳之一文碩原奏內稱值宿察吏向來僅祇平地未車城上則未嘗登陟請 飭景運門護軍統領
會同內務府大臣分投上城巡視一節係為杜絕匪蹤起見查紫禁四門左右馬道門外各有護軍五名
值班向在該門右洞棲止值班既遠兵數又少不足以昭慎重擬請由八旗護軍營各添派章京一員護
軍校一名護軍十名均在馬道門外值班由內務府武備院各支搭氈棚一座令其白晝在彼看守每日
初更時每旗章京一員帶護軍十名各持長鎗分投上城俾得巡視其餘護軍校一名護軍五名仍在馬
道門外看守仍由值班前鋒統領護軍統領及內務府大臣文武職大臣率同值班印務章京司鑰長各
執職任號燈每日夜間毋庸預傳時刻分投上城稽察該章京護軍等均令各執本旗號燈傳送籌支絡
繹不止黎明後該官兵等下城仍在馬道門外值班所需長鎗號燈由護軍營自行備辦再端門山左翼
前鋒營添派章京一員前鋒十名天安門右翼前鋒營添派章京一員前鋒十名均在該門左右馬道外
一併支搭氈棚值班看守每日由關左門值班司鑰長天安門值班副印務章京帶領上城巡視均二日
更換其添派官兵口分銀米懇 恩按照紫禁城內值班官兵章程一體支領以示體恤一文碩原奏內
稱六班值宿除王公領侍衛內大臣例不察更外其餘均應周歷巡視似宜酌分段落俾有專司擬請嗣

後太和門親軍及昭德貞度等門以內中一路護軍值宿均交散秩大臣偕同辦理事宜督察巡視凡包衣朱車專交內務府大臣率同包衣護軍統領督察巡視八旗朱車專交景運門護軍統領率同司鑰長督察巡視至於文武散秩大臣既無木管兵丁則協同稽查是其專責應不分文武每日輪一人分巡包衣朱車一人分巡八旗朱車以輔各該管大臣之不逮每日閤門後先察一次既而夜分再察每察時令隆宗門司鑰長撥給文武職大臣護軍校或藍翎長各一員護軍各五名俾資差委散秩大臣應帶親軍數亦如之內務府大臣差務煩重員數又少三院卿職司較簡可否照內大臣補班之例令其補進內務府大臣班等語臣等查所請分段稽查收效較易三卿補班亦屬允協均請如所奏辦理其所奏各處報單遞本管大臣外應令兼遞稽察大臣該大臣等次日交班時將報單交待衛處主事呈明王公內大臣存案一節查王公內大臣值班各有職守未便統管各處報單前鋒統領護軍統領內務府大臣亦各有專司自以循照舊章為是惟文武職大臣既有稽查之責若無報單無憑察點應令每日每處各備報單一分存置該班兵房無論文武職大臣巡察所至即呈單候點毋庸赴文武值班處呈遞以存舊職而免紛繁一文碩原奏內稱往昔開門接事總在丑正後有時或及寅初近今子正開門毋乃太早可否改循舊制並請申明舊例非黎明辨色不准擅出紫禁城並東華門西華門應禁婦女步行出入等語係

爲慎防濶跡整肅觀瞻起見均請如所奏辦理一文碩原奏內稱紫禁城內地面凡有專隸衙門處所應仍由各該衙門自派官役住宿看守其空閒處所由泰宸苑酌撥官役看守將官役姓名人數報明內務府景運門請給腰牌以便察核又貴恆原奏內稱請飭內務府大臣將各值所官役蘇拉及各太監他坦各處飯房夫役人數查明彙立清冊全行給與腰牌每日察點各等語擬請嗣後紫禁城內各衙門公所應由該衙門自行派撥妥協官役看守隨時查察並開具官役姓名年貌籍貫清冊咨報景運門以備稽察其內務府所屬各官所值房並各太監他坦等處應差官役蘇拉人等應令各該處自行核定人數開具姓名年貌籍貫清冊報明內務府景運門並各繕寫木牌一面懸掛各該處門牆每日開門後由內務府值班官員會同各處三旗該班兵役前往按牌查點倘有不符卽行拿辦內務府所屬空閒處所擬令關防衙門派撥委員蘇拉住宿看守仍由內務府值班官弁巡察所有各官所值房等處應嚴飭包衣護軍統領及該官兵等會同景運門弁兵隨時巡察如各該處有容隱匪人開設烟館賭局情事卽行查拿從重懲治倘值班弁兵有意懈偷安及人數不齊者一經查出卽行分別參辦並由內務府每屆半年揀派司員會同該管內管領將各該處詳細清查一次至各處官役人等例給佩帶腰牌現經內務府詳查該官役人等一律更換發給並營造司等處及道辦處武備院一併添給工匠夫役腰牌應請飭下

各該管衙門嚴飭該官役人等一體佩帶以憑稽察倘有不遵及商賈閒人自行濶入並各他坦太監帶入經官兵拿獲輕則枷號示眾咨報步軍統領衙門限滿釋放重則送部治罪至文碩所請由泰宸苑酌撥官役巡守查禁禁城內地面除河道外向不歸泰宸苑管理並所請各處照保甲連坐及首告予賞之處事多窒礙流弊易滋均應毋庸置議又文碩原奏內稱阿哥所宜如何派撥官役常川遵守請飭該衙門妥籌辦理查阿哥所正門左右門每日有包衣護軍營章京一員護軍九名住宿看守四角係驍騎營章京一員帶領披甲三十一名住宿看守由關防衙門派乖哈內管領三員向只門外看守嗣後擬飭乖哈內管領會同值班護軍參領驍騎營章京每月朔望進內察看一次每屆半年由內務府揀派司員會同護軍營驍騎營詳細清查一次又文碩原奏內稱太監他坦規制宜肅等語已於前條詳議外其請由內務府將欽定宮史及現行則例有關門禁稽查約束各事宜逐細摘錄知照景運門等值班各大臣遵照擬如所請行文碩原奏內稱大清門內並西苑三海其門禁應一體慎重三海陳設宜每年夏季欽派大臣察驗一次等語查大清門闕左右門東西長安門均宜慎重看守禁止閒人往來應由該管大臣破除情面嚴飭所屬實力遵守舊章辦理三海等處實有閒人擅往河冰結凍時成羣嬉游尤不成事應由該管大臣飭屬禁止務期整肅其各處陳設本有典守舊章可循所請每年察驗一次之

處擬毋庸議又原奏內稱各衙門微員吏役人等徒步趨公往往山禁禁城內往來行走不過意取便捷可否准由闕左右門東西長安門往來出入一節查禁城各門向不准擅行出入在官員役往來行走均應恪守舊章未可因徒步趨公者行走便捷稍弛禁令况現值嚴申門禁之際整頓尙且未遑此端一開必致闖入洶跡是否因公亦難詳察所奏應毋庸議一文碩原奏內稱值班官兵如遇事盡職者量予獎賞拔以升階一節查年終 欽派大臣看視獎賞原爲體恤值班之意至格外獎賞拔補升階當以懲獲竊犯緝捕匪徒爲斷不得憑空給獎致啟濫緣冒濫之弊又原奏內稱午門值班緣事獲賊兵丁尙爲慎重職守可否 飭令挑充馬甲或開復護軍等語查午門護軍毆傷太監一案該護軍始而攔阻本其職守厥後懷疑追毆殊屬兇謬業經欽奉 諭旨從寬懲辦所請拔補缺分應毋庸議一文碩原奏內稱宿衛官兵每屆冬令風雪嚴寒勞苦可念該管大臣應籌畫添給柴薪其在門洞值宿兵丁尤宜給予勅木噴支搭俾資棲止各節擬由各該衙門酌量籌給俾資實惠一文碩原奏內稱文武職大臣進班先是欽奉 特簡數員輪流入值既而指名擬派奏請入值者有之同治年間該大臣等於遊議進班章程內始請文職至三品武職至二品一體值班毋庸一一奏派但諸臣中有年齒漸高之人雖精力未衰無妨任事然論步履之長恐非所勝是原議章程猶有未盡等語所論亦是所有文武職值班大臣嗣後擬請

飭查照從前舊章指定委派一貫恆原奏內稱馬道各門鎖鑰歸內務府管理事樞未一請 飭歸值

班統領交替掌管等語查馬道各門鎖鑰向歸值班司鑰長收管並不由內務府管理應毋庸議惟紫禁

四門樓端門天安門樓均有內務府武備院存儲官物亦應慎重請 飭下各該衙門選派司員於每日

黎明時會同值班印務章京副印務章京司鑰長察驗有無情形出具掛結呈報景運門存案備查一陳

啟奏原奏內稱請 派親王會同內務府大臣前鋒統領護軍統領於禁垣以內及左右切近之處凡係

官舍閒房如有開設烟館賭局及容隱匪人情事查拿懲辦等語該御史意在澈底清查不知禁城重地

理宜鎮靜現在重犯業經止法誠能巡緝認真盤詰嚴密既可無虞於將來自可寬宥其既往若如所奏

必須王大臣率領多人到處搜察不惟有乖體統抑亦徒駭聽聞應毋庸議以上應行各條應由總管內

務府大臣前鋒統領護軍統領督同所屬官兵實力奉行至堆撥住址務須齊整器械務須適用兵丁務

須精壯足額均當隨時力求整飭毋致日久生懈自干咎戾又奏 奕劻奏 懿行與 奕訢等會議

內閣侍讀學士文碩內閣學士崑恆御史陳啟泰條陳禁城稽查事宜各摺片業經會同內務府大臣前

鋒統領護軍統領詳議章程分條具奏 等復公同商議立法固期周密而欲行之久速尤必嚴賞罰專

責成方不至視為具文謹臚管見所及為 皇太后 皇上臚列陳之一該管大員處分宜嚴也 禁廷

重地值班大臣各有宿衛之責嗣後如再稽查不嚴致有匪徒潤跡及盜竊案件其值班之兩翼前鋒統領八旗護軍統領總管內務府大臣應如何嚴定處分之處請 飭下吏兵二部分別酌議具奏一十處弁兵挑選宜慎也各門值班弁兵必須年力精壯技藝嫻熟方資得力嗣後遇有兩翼八旗弁兵各缺應請 飭下各該大臣秉公認真揀選不得以老弱冗數並資成查營御史嚴察挑缺不公之弊以昭慎重一老弱包班積弊宜除也各門前鋒護軍輪流值班各有專責乃聞近來頗有老弱之人包攬替班正身並不值宿應請 飭下前鋒統領護軍統領嚴行稽察禁革包攬代替之弊汰弱留強毋稍遷就所有值班官兵應如何酌加津貼以示體恤由該管大臣酌度辦理一緝匪兵役賞項宜優也步軍統領衙門職司巡緝果能破案必破宵小自然斂戢兵役人等承緝要犯非酌加賞項不足以資鼓勵應請 飭下步軍統領衙門嚴飭兵役勤加緝捕一經獲犯立予優賞勿稍吝惜並嚴察侵蝕中飽之弊是亦整頓捕務之一道也一內務府大臣宜照舊值班也查會典內職內務府按口值班於紫禁城每日以總管大臣一人在署值宿以次而代等語近年內務府大臣值班往往以司員代之視為故常惟該司員官職較卑難資統率應請 飭令總管內務府大臣嗣後仍按日輪班值宿認真稽察不得率以司員代班以符舊制以上五條皆為整飭禁衛起見伏祈 聖明採擇施行竊維 宮廷制度本有成法可循無如日久懈生

漸至有名無實此次臣等遵 旨會議章程或量為變通或申明定期於力除積弊而前鋒統領護軍

統領日值禁垣責任尤重應請 飭將新定章程實力奉行永毋懈弛庶幾禁令森嚴而拱衛益加整肅

奏入欽奉 慈禧端佑康頤昭豫莊誠皇太后懿旨前據內閣侍讀學士文碩內閣學士貴恆御史陳啟

泰先後陳奏請嚴申門禁詳定稽查章程等情當諭令醇親王奕譞會同御前大臣軍機大臣總管內務

府大臣前鋒統領護軍統領妥議具奏茲據王大臣等奏遵議覆陳及紫禁城外圍各該旗分定值班處

所並據恭親王奕訢等另奏會議未盡事宜敬陳管見管理神機營王大臣奏遵撥官兵協同巡察各摺

片禁城重地理宜嚴肅官兵值班稽查本有成法可循乃日久廢弛甚至宵小潛蹤迭次偷竊尙復成何

事體亟宜認真整頓茲覽王大臣等所奏或申明定制或因時變通尙為詳細所有紫禁城內地面嗣後

著該管大臣等及神機營官兵分定段落嚴密梭巡並上城巡察其各衙門公所該衙門當隨時查察並

開具官役清冊咨報景運門以憑稽查內務府所屬各官所值房並各太監值坦等處當差官役蘇拉人

等卽令自行核定人數開具清冊報明內務府景運門每日由內務府官員會同三旗該班兵役前往查

點倘有不符卽行拿辦各該處如有容隱匪人及吸烟聚賭等事卽行從重治罪官役人等應帶腰牌著

嚴飭一體佩帶倘有不遵致商賈閒人混入並各他坦太監帶入拿獲分別懲辦西苑三海等處一併嚴

禁閒人擅往至紫禁城外圍各門各朱車柵欄卽照所擬每日下五旗分定處所各有專管段落公同值班前鋒護軍各營值班弁兵必須年力精壯技藝嫺熟方資得力著該統領詳加查察汰弱留強嚴禁包攬替班等弊遇有缺出秉公揀選不得以老弱充數責成查營御史嚴查挑缺不公之弊值班官兵應如何酌加津貼以示體恤由該管大臣酌度辦理並著步軍統領衙門督飭兵役認真緝捕一經獲犯優予徵項毋任稍有侵蝕中飽總管內務府大臣例應每日一人在署值宿以次而代嗣後仍著按日輪班宿署不得率以司員代班三院卿職司較簡並著與總管內務府大臣一體進班文武職值班大臣著查照舊章指定委派經此次詳定章程後該管大臣等務當實力奉行永毋懈弛並不准稍有推諉倘再稽查不嚴致有匪徒混跡及盜竊案件卽將該管大臣等及所屬官兵分別嚴懲前鋒統領護軍統領總管內務府大臣應如何嚴定處分著該部分別酌議具奏神機營官兵如協巡不力亦著從重懲辦所有各該官兵如能拿獲匪犯准照所議酌量給獎○乙丑諭此次京察引見年至六十五歲以上之內閣典籍端木琛等均著照舊供職○諭左宗棠奏續請調員差委一摺除道員王嘉敏周崇傳業經發往江南差遣外道員王詩正譚信樂王立鼐知府章棟直隸州知州石本清同知裴如林通判周銘旗知縣柳葆元吳錫震陳崇煌陳彤輔禮部主事王金華著吏部查明飭令該員等前赴江南交左宗棠差遣委用其所請

改留省分補用班次各節著吏部議奏○林肇元奏諭省捐納勞績人員仍形擁擠請再展停分發一年
下吏部議奏○丙寅兩○丁寶楨奏光緒七年九月二十四日准刑部咨光緒七年七月二十日內閣奉
上諭御史胡隆洵奏請將盜案仍照舊例分別首從辦理一摺刑部議奏欽此經部議請將就地正
法章程先行停止請 旨飭下各省督撫將軍都統府尹體察情形將夥眾持械強劫案件仍照成例解
由該管上司覆勘分別題奏不得先行正法迅速妥議具奏等因當經 檄飭臬司遵照確切體察地方
情形妥議去後茲據署按察使崇綱詳查川省幅輒遼闊鄉間戶口並非衆族而居匪徒最易窺伺是以
報劫之案甲於他省且道路遙遠解省勘審近則百里至數百里遠或千數百里二千餘里每案人犯多
則十餘人少亦五六人不等長途押解疏脫堪虞兵役既多解費吏鉅各犯自知所犯必死一經解省翻
易原供以冀苟延殘喘輾轉行查捉獲動輒經年累月案始了結事主畏受拖累每多噤匿不報州縣解
費難賠亦必相率諱匿遂至匪徒愈肆盜賊橫行不得已於咸豐三年變通辦理奏明就地正法以靖地
方非盡因軍興始用重典自定章以來凡各屬稟獲盜犯或由本府親提或委員前往會審如有犯供游
移賊證不確則暫行監禁俟拿獲夥犯再行訊辦果係賊證確鑿始稟請就地正法核明辦理不為不慎
茲奉 諭旨以御史胡隆洵具奏請復強盜舊例經部議請停止就地正法飭令妥議詳辦竊思川省自

辦理就地正法以來已歷年數盜案尙未盡絕一旦改歸舊例照常提解則拖累繁費勢所不免誠恐地方官力難賠累諱飾消弭迫發覺嚴參地方業已受害殊非除暴安良辟以正辟之意惟刑部議請停止就地正法以各省辦理未能畫一竟有地方官拿獲盜犯徑行處決始行詳報其中誠難保無規避處分藉盜銷案自應仰體 朝廷寬大之仁格外慎重以恤民命體察情形籌商再四照常提解實多窒礙惟有於委審之中再加詳慎庶免流弊擬請嗣後凡遇州縣報獲盜犯如係道府同城即飭該管道府就近親提審訊如非同城而距省近者由省遴委道府大員親詣即酌委本管上司或鄰封州縣前往提訊果係賊證確鑿情無可疑仍稟請在本地正法俾已犯者不至久羈囹圄另生他變未犯者亦得觸目驚心稍知畏懼且案經委員提訊即與解省勘審無異遇有犯狡展就近傳質亦甚便捷委員既無承緝之責奉委審辦民命攸關斷不敢遷就迴護自取咎戾庶於慎重人命之中仍寓懲創匪類之意等情請奏前來臣復就川省現在情形細加查核覺嚴獄貴因時而情法尤宜允當川中地密民稠人心浮動囑匪會匪島匪實繁有徒近又加以游勇散練動多向聚盜劫之案層出不窮臣到任後復屢飭嚴查懲辦而盜風仍未盡息足見治罰宜嚴實非虛語該署臬司議請照前就地正法免其解審實為因地制宜起見合無仰懇 天恩俯念川省盜案過煩礙難提解准該署臬司所議以後州縣報獲盜犯分別是否與

道府同城及距省遠近酌量委員提審如贓證確鑿仍行稟請就地正法以昭炯戒而省擾累下刑部知之○戊辰兵部尚書毛昶熙卒予祭葬贈太子少保銜子繩恩賞給員外郎孫慈望賞給舉人○以張之萬爲兵部尚書○諭給事中孔憲毅奏巡視中城給事中師長灼聽任伊子師岱及家人馬祥等在外招搖舞弊上年十一月間家人或大商二訛案被讞一案株連二十餘人馬祥從中串說案銀入手始將原案移送南城其審訊案件往往將司坊原供印文塗改煨燬看押釋放人犯不批卷尾亦不會商滿員略輕贖重顛倒任情本年高雲川在步軍統領衙門控告彭俊三案內有師魯生過案等情師魯生卽係師岱中城練勇局新派哨兵高鍾山李鴻達二名亦係師岱得錢五百千師長灼聽從添入又中城指揮張得先卑鄙不職日在師長灼私宅與家人交結唆令訛詐生事並持名片代傳巡城口諭看押釋放人犯乘機舞弊等語著都察院堂官秉公認真查明據實覆奏○孔憲毅奏近年各省率以人員眾多請停分發何至有乏才之患欲盡借於異地不謂停止分發之文甫經奉准而調員差遣之奏又復紛來矛盾情跡殊難索解豈循例分發者一無可資贊助者乎抑亦枉己徇人庇所私而曲爲之地耳從前李鴻章奏請袁保齡章洪鈞諸人左宗棠所派曾沅及近日奏調王嘉敏周崇仰各員尙不免於物議外此之相率效尤更無論矣大抵隔省調人最爲非計其人不知何事乎旁搜遠探其人果賢亦未免此得彼失蓋久

經到省之人本省情形較爲練習聲望既著上下交孚其不願去此適彼明矣故今紛紛求調者非補習無期卽資劣素著者也縱無此弊而以天下之才不能自見於天下而先委身於私門則有氣骨者當亦不樂於此況乎鄉宦雖有彼此之分朝廷原無畛域之視道途僕僕遷地弗良又何爲耶所謂人才之升降恆視氣節爲轉移公正者登則惡趨公正資緣者進則成事資緣者謂幹濟時艱任此一二期奉養楚之輩欲藉爲鼓舞人才之計恐無其理伏讀乾隆二十九年高宗純皇帝諭曰督撫而請留屬吏則上官之推情贖願與下僚之因事干求流弊何所不有等因又嘉慶七年仁宗睿皇帝諭曰督撫身任封疆自司道以下皆係幫同辦事之人至署中一切案牘自有幕友辦理其簡放督撫及署理督撫者卽所屬官員亦均不准奏請隨帶如有違例奏請者卽著交部議處以肅政體而杜弊端欽此仰見列聖整飭紀綱防微杜漸之意今各省督撫於屬省人員動輒奏調顯係有乖成例瞻顧干求均所不免相應請旨飭下各省督撫以後屬省人員毋得率行奏調以符舊制並飭吏部嚴定濫調處分章程庶上官無所徇而專意人才下吏無所恃而精求治理斯吏治可期蒸蒸日上矣上諭給事中孔憲毅奏督撫奏調屬省人員請飭禁止一摺各省督撫奏調屬省人員原爲深知其才藉資得力若如所奏恐微徇私資緣之漸流弊亦不可不防嗣後各省督撫於屬省人員毋得藉端濫行奏調以杜取巧○子江蘇吳縣

孝女盛陳氏旌表○己巳諭刑部奏請將供詞閃爍恃符狡展之侍衛暫行革訊等語花翎侍衛兼公中
佐領慶良著暫行革職嚴訊究辦○戊午諭前據御史秦鍾簡奏四川官運鹽局虧缺甚鉅曾令委署人
員捐銀填補現任藩司鹿傳霖有接任不接庫之事當諭令鹿傳霖據實具奏茲據奏稱前藩司程傑任
內委署州縣雖多鹽局人員實因辦事不得力未聞有捐銀填補虧缺之事官運局奏明借撥藩鹽兩庫
欸項僅未還銀十萬兩原參虧挪落庫銀兩該藩司接任不接庫一節尤屬虛無此次盤查該局調閱帳
簿欸目相符等語四川官運鹽局既據查明並無虧短情事該御史所奏即著毋庸置議仍著丁寶楨督
飭局員隨時核實經理毋任滋生弊端以重帑項至委署州縣並當秉公遴選不得稍有瞻徇用副委任
○辛未又兩○祭 歷代帝王廟遣載勛行禮○壬申諭御史陳啟泰奏各省盜案就地正法竟程流弊
甚大請飭停止一摺著刑部彙入各省覆奏御史胡陞洵摺一併妥議具奏○允鑲黃旗蒙古都統穆騰
阿開缺調理仍賞食全俸○以克蒙額為鑲黃旗蒙古都統○鍾佩賢奏內外設官各有體制督撫身任
封疆所屬官員自司道以至州縣皆隨同辦事之人近年分發各省候補試用人員更較從前多至數倍
其中應不乏可用之才豈必待調取京員方能集事軍興之時用人不拘常格自可從權現在軍務肅清
已久而外省請調京員習為固然並有請調翰林者以文學侍從之臣下供驅使差委殊乖 國家設官

本意 皇上若以此一二翰林宣於外任原可改授道府等官無待於督撫奏調今論官則仍別詞曹而奉職則已同外吏體制既多未協名實亦覺相淆且恐銜緣奪競之風山茲而起伏查嘉慶七年督直隸總督張敬甫請隨帶御史沈錫章幫辦事務奉 上諭嗣後在京部院大臣除有兵差審案等事仍准隨帶司員外其餘放督撫及署理督撫者不准准帶御史即所屬官員亦均不准奏請隨帶如有違例陳請者即當交部議處以肅政體而杜弊端將此通諭知之欽此 聖訓煌煌允宜遵守夫翰林秩列清華其責近過於御史非司員可比又隨帶祇能在赴任之初而奏調則聽其隨時具摺司員尙不可何況翰林隨帶止一次尙不可何況頻頻奏調此其顯違定制其端似不可開臣愚擬請 諭飭吏部將近年各省奏調翰林及部屬等官共若干員查明請 旨一律撤回並 嚴諭各督撫毋得再行違例奏調以杜流弊又奏近年各省因候補試用人員擁擠日甚奏請停止分發此實澄清吏治之首務臣猶以部臣僅准停止二年之議爲未足也所不可解者甫經請停分發未幾又請調他省之員以資差委豈本省大小數千百員中竟無可以差委者耶如謂各員皆庸劣下材不堪任使則何不從嚴甄汰以清仕途如謂所調係出色之員則此省需才彼省未嘗不需才何必移彼就此顧此失彼抑謂所調乃平日所知則大吏日接俟屬分應隨時隨地留意人才豈必定須故舊方可信任今請停分發之奏則曰人浮於事隔省調

員之奏則曰差委需人前後矛盾絕不相容沿習成風恐徵費緣之漸查定例各省奏用之人原准奏請
據發惟不准指名附請可否 申諭各督撫恪遵舊制凡未停分發省分如值差委乏人照例奏請據發
其已停分發省分即於本省人員內差委概不准指名調員以杜夤緣而符定例 上諭太僕寺少卿鍾
傳賢奏督撫奏請京員體制未協並指調他省人員沿習成風請飭禁止各摺片自係為嚴防流弊起見
嗣後各督撫不得再行奏請翰林部屬等官用符定制至屬省人員業經申諭不准濫行奏調如果委用
需人原可遵照舊章奏請據發毋得紛紛指名奏調以杜夤緣而肅政體○丁寶楨奏川省自咸豐年間
雷餉浩繁不敷接濟經前督臣奏准按糧津貼每條糧一兩津貼一兩隨糧上納歷經戶部指撥京餉兵
餉難以停止頻年奏奉 諭旨允准在案茲據藩司鹿傳霖詳稱光緒七年自開徵起至十月底止共收
津貼銀四十七萬一千四百二十七兩一錢五分二釐零又續收歷年未完津貼銀七萬三千六百三十
七兩八錢五分三釐零共收銀五十四萬五千六十五兩五釐零除分解原撥京餉銀一十五萬兩續撥
京餉銀三萬兩又奏撥伊犁償款銀四萬兩東北邊防經費銀五萬兩又本省旗綠兵餉奉撥津貼銀一
十五萬兩共計銀四十二萬兩均係京外正供餘銀一十二萬五千六十五兩五釐零撥借防剿經費至
另收捐輸釐金歷係分撥直隸雲貴陝甘新疆准軍各餉均隨到隨解毫無存積綜計收支各數仍屬入

不敷出來年奉撥京外各餉必不能少若不預爲籌備深恐貽誤要需司道通盤籌畫擬請按照歷屆成案於光緒八年再行勸辦按糧津貼每條糧一兩仍津貼庫平銀一兩於開徵時如數隨糧上納由司刊刻告示徧貼曉諭除川北川南兩路爲喇嘛藏差必由之處酌留夫馬一二成以供支應外其餘各屬夫馬早已一概裁撤並將從前一切雜派經費一律禁革不准私立名目派收絲毫如有不遵一經訪聞或被告發卽行撤參究辦所有地處邊沿之汶川梓潼廣元昭化劍州蘆山青神松潘茂州岷州丹山馬邊雷波越嶲鹽源石泉綦江理番石砬天全筠連興文高縣珙縣敘永永寧榮經大寧清溪會理等三十屬州縣仍照章免徵津貼此外如有仍應減免者自當隨時查明分別減免用示體恤至徵收事宜及局申薪水餉鞘運費分別程途遠近查照向章辦理不准額外加派累民仍俟收解齊全綜計銀數請加申額以昭激勸等情請奏前來臣查川省年收津貼歷經戶部指撥京餉兵餉具來年京餉已奉旨准撥明年津貼行司遵辦在案事關止供費需如此中外庫款支絀不得不按案辦理以免貽誤仍恪遵上年諭旨隨時嚴飭各屬州縣實徵實解不准浮加分毫及另有津貼名目如查有前項情弊立即據實嚴參懲辦以期仰副 聖主軫念民依之至意下戶部知之○御史陳啟泰奏上維吏治之不振實由冗員之太多近日疆臣莫不意存見好三載考績之典久已視爲具文隨時甄別之條亦止虛應故事各省分發

勢又不能久停滯情形日甚一日前惟吏部奏定考試章程其不列等第者勒令回籍可爲沙汰之一助然不過白中之一二仍於大局無裨也乃近見貴州撫臣林肇元奏請將考不列等之員仍准留省學習殊不可解該省官途之雜無出其右經岑毓英極力整頓稍爲改觀不知該撫何以愛惜此等庸劣之員輕易前規代爲彌縫各員聞處省垣豈無請託干求情事既可違例容留何難藉詞差委弊端一開各省紛紛效尤部章將成虛設應請 飭下各省督撫於各項人員認真考試其不列等第者即當嚴定限期照章勒令回籍毋任逗遛不得違例奏請留省學習以杜瞻徇年滿年終甄別尤當破除情面實力裁汰不可但以佐貳佐雜教職等員塞責以期仰副 朝廷澄敘官方之至意 上諭御史陳啟泰奏各省考試不列等第人員請嚴定期勒令回籍等語著吏部議奏○癸酉 上諭 奉先殿 壽星殿行禮○命徐建寅以知府發往直隸交李鴻章差遣委用○李鴻章奏欽奉光緒七年十一月十二日 寄諭有人奏直隸郵署文安縣知縣陳紹謀在署任時妄議加增稅糧藉端勒捐因案納賄諱盜爲竊各等語著李鴻章董華游百川按照所參各款秉公查明據實參辦等因欽此除原奏陳紹謀藉端勒捐因案納賄諱盜爲竊各款或有案可稽或須提訊人證俟 等詳細查明另行據實奏辦外其所參加增稅糧一欸係指現議清查東淀地畝而言查東淀本甚寬廣東西一百四五十里南北六七十里係爲大清等河

尼岡落洩之區關繫至重乾隆三十七年奉 上諭浣泊利在寬深其旁間有淤地不過水小時偶然涸出水至仍當讓之於水方足以暢滂濂而資蓄嗣後毋許復行佔墾違者治罪等因欽此煌煌 聖訓而應永遠遵行乃附近鄉民逐漸侵種百數十年來竟已佔去淀地大半現存不及三分之一臣往來津沽親見葦密叢樹望無涯不特難容多水即淀中荷有河道因而淤墊重煩官款挑挖該淀既節節壅滯上游各河遂泛濫為災動關全局及今不治再閱數十年將東淀胥為平陸矣乾隆年間前督臣高鳳雖有河淤地准民墾種之奏然只准墾種無礙水道之地又聲明已報升科者應改為租息分別上等等每畝定為租銀八分六分三分以充河工歲費每戶種地不得過百畝仍嚴禁紳衿胥役豪強詭名佔踞今則不論有無礙水道概行侵種且係豪強佔踞每戶至數十頃所呈契單大率假借隱射其糧額則從他處割裂飛洒並非現種空地之糧該業戶等侵佔空地又飛洒糧額實屬有心朦混本應照例治罪撤地入官惟念愚民不知例禁相沿已久或輾轉買衣食所資未便一律禁絕不得不變通辦理當於去秋飭派奏調差委道金福曾天津道吳毓蘭督同沿淀霸州文安大城靜海四州縣斟酌查辦今將實係礙水之地仍讓於水其餘飭各業戶將糧地若干完糧若干自行據實報出聽候派員勘丈其有糧額者雖不免飛洒情弊首先就糧核地仍歸原業戶承繳其無糧額者亦仍歸原戶並按照前督臣高斌

奏案酌改租息以充治河經費旋據金福會等酌擬章程四條一曰定界址凡有礙水道及現在水深數尺尚有淤形之處應留以資蓄水永遠不准栽葦種其中未完納葦課水泊等糧者查明奏請轉免若稍礙水道而入被淤墊驟難收回者令於地中多開溝渠使水至仍可流貫一曰設堡船淀中須藉堡船似夫撈泥挖淺凡礙水之蘆葦荻草隨時芟刈以期日久見功應就所收租息多寡以定船數一曰議租息凡不共礙水道地畝有糧額者就糧核地照舊完納無糧者從輕議租上等以每畝三分為率次則遞減惟淀中漲澗無定毋庸升科此後若礙水道仍應停種免租讓地於水所收租息即作發船經費一曰均差徭淀地皆在水濱升科尚且不便何況差徭乃州縣苛派書役需索大戶則隱射邀免盡累貧民應體察分別裁減均平以昭公允以上各條實係因時制宜格外從寬查肅州文安大城靜海舊例葦課自數釐至六分不等文安淀地租銀三分至八分不等靜海有至一錢六分者乃原奏葦課舊例自數釐至一分八釐而止並未考查明確現議有糧之地照舊完納無糧之地上等每畝租銀三分次則遞減並無將久經奏定之租額加納八分六分之事且侵種者並未遵照 列聖諭旨撤地治罪亦未限以畝數轉予輕議租息尙得謂為加稅聚斂耶此案係派員查辦亦非陳紹謀所能妄議前聞各戶中有刁劣之徒侵種多頃久未完糧因而造謠煽惑希冀把持固利是以傳聞失實事關清理東淀水道斷難中止

致誤全局臣飭金福曾等仍督同印委官員悉心體察持平核辦如有造謠阻撓及任意隱佔者應查實分別革究並將無糧之地入官庶窪地可漸疏通水道不致阻滯報聞○乙亥祭 先農壇遣魁斌恭代行禮○丙子諭靈桂等奏遵旨查明據實覆奏一摺據稱銀庫收發款項向由管理三庫大臣等督率司員眼同平兌各省餉鞘到京戶部將文批付庫挨次驗收迴批係當堂飭領現經傳訊浙江等省委員及交指各號商致稱並無刁難勒索情事銀庫書吏期滿擇其當差勤慎者充補前因書吏孫際昌告退以韓秀甫充補韓秀甫非接充韓士傑之役並據該書吏供稱實無韓士傑在身後影射朋黨內亦無韓士傑其人上年閏七月間江蘇委員在都察院呈控孫際昌扣留迴批當經送交刑部旋以懷疑誤控完結此外別無書吏被控之案史恩濟等亦未冒替招搖等語此案既據查明銀庫書吏尙無招搖舞弊及身後辦事等情著免其置議現充書吏韓秀甫雖無藉端勒索實據惟既招物議著照所議即行斥革嗣後該管大臣等務當隨時查察倘有書吏舞弊立予從嚴懲辦○丁丑諭刑部奏審明職官摺擬奏底加等定擬一摺此案已革吏部筆帖式龍世清輒敢擅擬奏底藉端訛案竄屬刁惡著照所擬從重發往軍臺効力贖罪已革侍衛慶良聽從代為投遞從中調停已屬不安本分業已革職著即遞回原籍交旗嚴加管束至古尼音布前奏所稱爲伊孫等娶婦日期俱係遵照會典一節著吏部查明具奏○戊寅吳大

徵奏吏治之廢興視乎人才之賢否而任用之權操之大吏大吏秉公考察實力講求則賢者皆得盡其才能中材亦各知所趨向若拘泥定章而敘補輒多遷就或變通舊例而去留轉涉偏私皆於吏治有損而無益也以為國家立法所以防流弊而舉劾之典存乎其人公論有是非宸衷亦有權衡苟於地方利弊有關部臣守經而疆吏達權但求其於事有濟耳查吉林府設理事同通三屬添設賓州五常二廳敦化一縣將軍寬安又於上年十一月內奏請添設吉林道缺擬改吉林同知為知府並於伊通河添設知州一缺此外如寧姓瑛三城尚有應添道府屬縣各缺實因地方遼闊耳目難周緝匪安民須圖久遠奏添各缺事均須開創非為守兼優實心任事之員不能措置裕如就據發到省及奏調差委各員兩途並用尚可輪流蓄補為地擇人現准吏部議覆吉林將軍銘安等請補各缺定章一摺准其仿照奉天章程奏請揀發曾任實缺正途人員不分滿漢酌量請補並申缺知縣一項仍以候補委用兩項相間輪補又請查照奉天停止奏調成案嗣後不准奏留奏調他省候補候選人員差委補用以節劃一如在此次奉旨以後奏留奏調到部者即行議駁奉旨允准之件仍應請旨更正以示限制等因於光緒七年九月二十九日具奏奉旨依議欽此由部轉行欽遵在案臣持議本係援案奏請毋庸再行續陳惟查省情形正需才孔亟之時遴選稍寬尚可拔十得五實因邊地苦寒賢才裹足指省分發人員

並無指分吉林之人奏調各員必平日略知梗概到省既久歷經考驗始擇其人地相宜者酌量留亦極周詳慎重若一概拘以成案則從前奏調差委中有得力之員亦將格於部議棄而不用是不免因噎廢食於邊省用人之途似多窒礙○之愚見擬請飭部察度情形再行核議或於奏調奏留一節酌予年限俾新設各缺均可得人而理俟地方布置漸有規模風俗民情悉臻安謐三五年後再行援照奉天成案請停奏調庶目前可收指臂之助日久亦無冗濫之員似於古省吏治大有關係下吏部議奏○庚辰准山東曹州鎮總兵開缺終養○召詔誠來京以方大湜爲山西布政使調剛毅爲直隸按察使以劉瑞芬爲江西按察使○邵亨豫因病奏請開缺不允予假一月調理○以孫家鼐兼署吏部左侍郎許庚身兼署戶部右侍郎○壬午浙江奏報光緒七年分滋生民數計男女大小一千一百五十七萬一千九百三十七丁口○諭誠端奏請飭查驗明陵種地砍樹情形一摺明陵左近開墾地畝上年四月間經戶部奏定章程諭令直隸總督順天府尹查明分別辦理現在會否清查完竣著將辦理情形據實具奏並飭該地方官隨時稽查嚴禁砍伐樹株以副隆禮勝朝之至意○癸未左宗棠等奏准刑部咨御史胡隆洵奏請將盜案仍照舊例分別首從辦理一摺部議以欲復情有可原舊例莫若將就地正法章程先行停止應山各省體察情形議奏核辦等因具奏奉旨依議欽此欽遵咨行到部卽經檄飭臬司移會

淮徐二道體察詳去後茲據署臬司邵雲鶴暨淮揚道桂嵩慶徐州道程國熙先後議詳前來臣等查江蘇省各屬尋常搶劫並無迭劫兇暴情重案犯近年以來皆以遵循定例解省勘題聽候部覆辦理惟淮徐海三府州屬距省窳遠民情犷悍搶劫頻仍一經獲犯若不就地嚴懲非特輾轉解勘疏脫劫奪在在堪虞且被害之商民未得見其早日伏誅寃忿莫洩卽匪黨亦無所警惕難冀其猛省回頭其甯蘇常鎮等屬間有拿獲江洋巨盜游兵散勇積匪踴爲實兇兇暴聚著之犯於訊明稟報後亦批飭就地正法此又近年遵奉新章除尋常案犯外就地正法之情形也夫爲政首重安良而安良又必先除暴江蘇濱臨江海口岸警多華洋商賈輻輳雲集值此奸宄淵跡出沒無常之時非懸一重典以嚴爲之防竊恐震懾無由轉致釀成隱患然所謂就地正法者亦必所獲之犯兇惡聚著山州縣審訊得實稟明督撫督撫批令該管道府覆加研鞫果屬確鑿始行批准照辦其稍涉疑似者或詳省覆審或監候待質是於嚴懲之中仍復愼益加愼並非輕視人命稍事刻核也擬請嗣後淮徐海三屬拿獲夥衆持械搶劫情重案犯如果審訊明確法無可貸仍照章解山該管道府就近審擬稟請就地正法其甯蘇各屬拿獲江洋巨盜游兵散勇積匪踴爲實兇亦仍照章辦理以遏亂萌而安良善一俟盜風稍息游勇漸少再當概行請復舊制下知部知之○甲申以升泰爲內閣學士仍留伊犁參贊大臣任○以嵩甲爲內閣學士○總督銜前福

建巡撫丁日昌卒予祭葬○以唐炯爲雲南布政使○諭軍機大臣等唐炯現已簡放雲南布政使其四
川官運鹽務向係唐炯一手經理頗著成效現須交卸赴任所有該局事務關繫緊要即著丁寶楨遴選
委員奏明委辦並嚴飭各該員等認真經理毋任日久廢弛將此諭令知之○諭前因張之洞奏請將編
修王文錦發往山西當經降旨允准茲據翰林院奏該編修瀝陳下忱呈請代奏一摺王文錦著即毋庸
發往○何璟等奏案准吏部咨議覆御史戈靖條奏摺內捐納勞績兩項官員府廳州縣試論一道佐雜
試以告示判語定列等第其四等不列等者予限學習於光緒五年七月二十一日具奏奉 旨依議欽
此又於七年六月十六日奉 上諭據內閣學士張之洞詹事府右庶子周德潤御史洪良品先後因呈
變陳言詳加披閱所陳各條不爲無見等因欽此仰見 聖主整飭官方勵精圖治詭譎之下惶悚莫名
臣等忝膺疆寄察吏安良責無旁貸惟有欽遵 諭旨認真整頓不敢稍存姑息當即檄飭司道將應如
何考試裁汰妥議具詳以便請 旨辦理茲據署藩司張夢元署臬司葉永元署糧道謝家瑞鹽法道翁
學本詳稱閩省候補試用府廳州縣佐雜鹽務各班共計一千二百餘員除由科甲暨舉貢生員廩生緝
譯出身者例不須考又未經引 見驗看照例應迴避各員先行扣出外其由吏員監生俊秀捐納勞績
出身例應考試者共計府廳州縣一百五十四員鹽大使五十五員佐雜各班共五百九十六員又現任

應考正雜一百五十九員鹽大使一十五員通共應考九百七十九員擬請不論曾經考過與否一概調
集由臣等督同司道分次屬試擇其文理通暢者知府直隸州知縣鹽大使各取留五成同知通判佐雜
各留四成現任照舊供職候補試用各班照常補署差委其餘分別開缺飭令回籍悉照部章辦理以清
仕途等情詳請具奏前來臣等伏思吏治之壞由於捐保太濫流品混雜自非嚴加考課仕途難以澄清
查吏部定例各項試用知縣各按名次減半扣留佐以雜職酌留十分之二等語係爲按班序補而設現
將實任候補試用各班應考人員認真考試以取留四五成爲率如果文理通暢者多並才具堪以造就
者多棄之可惜隨時酌量辦理取留各員復察其才能操守照舊章甄別裁汰力加整頓庶吏治可望日
有起色得 旨如所請行○乙酉諭前因翰林院侍講學士陳寶琛奏江甯三牌樓命案疑竇孔多當派
尙書麟書侍郎薛允升前往查辦該尙書等馳往江甯提案研訊取錄各供曾經具奏大概情形諭令督
訊定擬茲據奏稱訊明周五卽周步陟挾仇起意謀殺朱彪商同沈鮑洪卽潘洪潛攜短刀尋過朱彪糾
邀行竊至三牌樓竹園旁將朱彪砍斃同逃並未移屍嗣經地保報縣驗詳已故兩江總督沈葆楨飭會
營務處洪汝奎懸賞購緝並派緝捕委員胡金傳密訪先後拿獲僧紹宗張克友曲學如並前教方小庚
作證胡金傳與閩官嚴盈同訊喝令用刑酷逼成招初供殺死謝姓旋供係薛姓名泳在繼後稱爲薛春

芳胡金傳輾轉誘令改供洪汝奎於覆審後以案情重大稟請派員覆訊沈葆楨以爲會匪自相殘殺批飭將曲學如僧紹宗正法上年拿獲竊犯李大瀾供出沈鮑洪周五殺死朱彪等情與辦結前案地方時日相符當將沈鮑洪周五覆案訊供不諱現經反覆推鞫周五沈鮑洪均各供認商同謀殺朱彪胡金傳亦將刑訊教供各情據實供吐方小庚張克友等供俱各吻合應卽擬結等語此案周五起意謀殺沈鮑洪聽從下手加功均脫逃已逾三年胡金傳故人入罪冤殺二命情節較重周五卽周步畛著依擬斬立決已革參將胡金傳著依擬斬立決沈鮑洪卽潘洪著依擬絞立決均著卽行正法兩淮鹽運使洪汝奎督審此案率行錄供於胡金傳教供私搆等情心無覺察候補知縣嚴學承審此案率將胡金傳誘取供詞認爲實情隨同附和竄屬糊塗謬妄洪汝奎嚴學均著革職發往軍臺効力贖罪餘著照所擬辦理會審此案之候補同知單之珩候補知縣丁仁澤著交部分別議處察議前兩江總督沈葆楨辦理草率實有應得之咎業經身故著免其置議○諭國家欽恤庶獄凡有關罪名出入之案無不愼之又愼誠以民命至重每年秋審人犯矜疑再四始定爰書各省問刑官員遇有重案宜如何仰體朝廷德意虛衷研鞫以期無枉無縱本日披覽麟書等覆奏江甯三牌樓一案訊明已決各犯實係冤抑似此輕率定讞枉殺無辜誠堪痛恨業將此案承審各員分別懲辦嗣後各直省督撫辦理命案務當嚴飭屬員細心研訊如

有疑望即應加意推求詳細覆核不得稍涉大意疑或偏執成見致成冤獄至武員例不應會審案件如胡金傳之刑求教供草菅人命尤屬兇謫已極倘各省再有此等情形定將該督撫等從嚴懲處決不寬貸將此通諭知之○丁寶楨奏查各鹽務省分均有頒發鹽法志以資遵守定制昭然凡在官商鹽戶無不奉行惟謹罔敢逾越以干刑章是以各省鹽務弊竇少非實在商疲困國家課稅無敢或虧且商鹽或至虧課而部頒引張均係存庫在官在商均無敢私發私領一引從未有引張發出百數十萬之多而課羨亦虧至百數十萬之多者駭人聽聞轉髮然自以為得計如川省之昏憤極盛者也○嘗推求其故固由於官商之放於貪詐然亦因鹽務初辦之時雖有成法可循究未經定為志乘頒發通行以資準則是以官商均恃其無籍可考相率營私任意舞弊只知肥己而不知病國病民迫有人從而矯正之彼則冥然悍然不自知其身之罹於法網也○自創辦官運後將鹽務一切積弊委員確查清理迄今綱紀秩然百弊略泯然事久則變不可不防因擬為久遠遵守之計與鹽茶道松藩建昌道唐炯等悉心商酌稽考成法仰鑒宸謨仿之各省之成規準以川省之情勢遠搜近考彙集鹽法志一書用為四川省日後不易之定則容俟彙集成編敬謹繕寫恭呈御覽飭部核議伏候欽定頒發川省遵守庶幾來辦理確有率循不敢稍萌貪詐之弊是亦考鑑之一端也報聞○丙戌予蒙內閣副學知林莊氏

等旌表○溥廉等奏承濟當自雍正七年蒙 恩賞發銀兩開設當舖並於乾隆五十一年道光二十二年先後請添資本共東錢十五萬吊按二分取利遵照內務府議奏章程以大盤利息交納承濟庫備用年終奏銷其不敷出入之本由該商自行增添與官本無涉歷經辦理在案奴才溥廉前於接任時應行清查因原當商宋嘉崑物故正在傳令另保新商曾經陳明俟另行會同清查具奏當即管當之員並另派司員將架貨當本利息逐一詳查招募妥實商人接辦現據管當司員查明票報原本資本共東錢十五萬吊按二分取利以大盤交庫備用以一分四釐作為該當人工費用其歷年置買房屋添置器具向由餘利存本內酌核動用仍按全本交利咸豐四年馬蘭鎮總兵慶錫開爐鑄造銅鐵大錢行使街市分成搭用該當曾經收過銅鐵當白當五十大錢核東錢二萬五千餘吊嗣因大錢行使壅滯經署馬蘭鎮總兵柏後奏請發交遵化州豐潤玉田四州縣變價行使按制錢歸還當本據玉田等州縣交還變價折銀給該當銀二百兩作本起息其餘大錢變價各州縣未經交齊此項發交各州縣大錢一萬四千二百六十六吊五百四十文並另存不庫行使當白當五十大錢一千七十吊應行交庫之六釐利息該故商仍按全數墊交計至光緒五年時歷二十六平共墊過利息東錢二萬三千四百七十五文間有餘利不敷周轉之時係山正本挪墊交利又添置房屋隨時修葺共用過東錢四萬五百五十五吊七

百七十文亦按原本交利刻下當存貨物並現存本錢共核東錢七萬一千一百三吊文連添置房屋器具作價實有東錢十一萬二千六百七十七吊二百十文均屬相符又馬蘭鎮營並蘭陽書院交存生息銀一千二百兩核東錢一萬二千三百二十吊係另款生息亦無虧短又因當本不敷周轉故商朱嘉寬有自行通融出入借貸帳目均與官本無涉亦不交恩等情並據承辦事務衙門行走右門工部員外郎繆綿內務府郎中德衡瀕阿爾薩蘭達桑阿員外郎廣泰公保該鋪領事當夥宋德魁妥慎可靠堪以派令接充當商稟請查核前來奴才等覆加詳核均屬相符伏查永濟當定章以二分取息較之民當減利一分設立有年奉祀官兵積食周轉久沐 皇仁利益實深原設當本東錢十五萬吊按年交利存於永濟庫作為官兵紅白事 恩賞等項之用係屬正款開銷迨至咸豐四年取收大錢行使滯滯發各州縣變價歸本當時因發放 恩賞均屬必需是以未經減利不圖各州縣屢催未交價銀又因收利較少以致將止本挪墊利息其多過利息均有奏銷案卷可稽尚非故商使虧今既另派新商核辦似應劃清界限以見帳目輕輻畏難賠累擬請將現有貨物架本共核東錢七萬一千一百三吊文即交新商仍按二分取息以六釐交庫其馬蘭鎮營蘭陽書院之另款生息照舊交利至歷年撥辦房屋器具作價並提交遵化蔚州豐潤五田四州縣行使未交價之大錢暨該當收存之廢大錢擬請暫停交利以免再行虧缺

正本並請 飭下直隸總督勒令嚴飭各州縣將原領行使之大錢作價銀兩呈繳陸續交該當隨時作
本起應又光緒六七兩年因出入當貨較少所得利息僅敷人工費用應交庫利請免交納以省賠累惟
是承濟當出入當貨需用銀錢甚多若就官本不敷周轉應照舊章山新商自行酌核添益私本期於流
通所添私本與官本無涉亦不交利其故商來嘉寬出入借貸私本應令分作十年由新商自行籌畫歸
還並飭遵化州察核取結存案如此通盤籌計期垂永久至該商應交官本利息仍令按年分作春秋二
季以錢易銀自行交庫嗣後該當過有修理費均由餘利內請用不得動用正本現派新商既經該司
員公同具保所有該當事務即交該司員等妥為經理該商或有事故仍令原保司員再行保商接充該
司員等如有升遷事故另行奏明補派或官本虧闕即著落賠補惟毋庸按年派員輪管以專責成此後
如有未盡事宜隨時奏明辦理報聞

臣朱詩朋敬編

臣潘鴻鼎恭校

三月丁亥諭各部院衙門京察一等記名人員本係以道府兼用近年各項勞績保舉往往請專以道員用嗣後著不准行○戊子予李鴻章假一月前往湖北省視母病並賞人參八兩○以張樹聲著直隸總督兼辦理通商事務大臣裕寬兼署兩廣總督○命都察院左副都御史陳蘭彬在總理各國事務衙門行走○諭御史謝謙亨奏盜犯就地正法章程請分別有無軍務省分辦理一摺著刑部彙入各省覆奏御史胡隆洵摺一併妥議具奏○丁寶楨奏官運鹽務本屆奏銷以及四綱引案日疏課釐增旺已定成規此皆上稟 宸謨下資羣力幸克臻此然臣以為 國家之至計貴有治法尤貴有治人回憶官運創辦之初凡在中飽之徒無不危言震恐百計阻撓又以其時成本過絀事事掣肘辦理殊屬為難臣與建昌道唐炯互相勉策以事關 國計民生甚大惟當竭誠圖維利害均可弗計唐炯以事屬艱難辦理必須得人查有貴州舉人揀選知縣華聯輝才智閎遠為守最優若得之參助必能多所規畫庶於有成臣即函致來蜀與之諮商一切藉聯輝初謂四川省鹽務名為不及兩淮然辦理核實實亦兩淮之次奈

攘其利者已百餘年遂致毀壞不可收拾今欲開辦官運爲疏引裕謀之計勢非專意於恤商便民不克爲功臣以引案甚繁成本甚絀呼應不靈將若之何華聯輝謂成本甚絀尙可設法惟口岸正多商情必迫而後根基可固竊願親赴各岸一行審量情勢再爲定奪臣當促令前往於所到各岸卽與各商開誠布公講求現在官運辦法而又與之區畫領鹽繳本各事宜計不及一月各岸商號之繳本領鹽者已不下四十餘萬唐炯見事機已順卽由此推廣而行故官運一辦便有成局此後則剔弊除奸遂漸展布事專求實遂致年勝一年今則規模大定但使恪守舊章卽可安坐而理是川省鹽務之振興實華聯輝之力爲最也臣竊維大學言平天下之道首重絮矩繼重理財誠以聚人曰財古今不易之理值時局變貧理財尤亟然理財出於培克聚斂是以利爲利實亦不足利國家華聯輝初語臣以恤商便民爲主是根本已立宜其以後諸事皆迎刃而解也臣數年來詳查華聯輝操行正大誠見閎遠才力堅卓調理精詳而其公忠自矢清白乃心在局數年不受一毫薪水尤爲近今罕見當此需費孔亟似此特出之才尙蒙聖明採擇破格錄用必能隨處適宜有所建樹決不致上負任使上諭丁寶楨奏保舉人才請破格錄用等語據選知縣華聯輝著以知府留於四川補用○任道鎔奏臣因東省庫儲日絀曾於上年九月間先撤果毅等步勇三營當經附陳在案現在冬防已撤查沂曹濟等屬另派勇隊擇要駐巡登州

福山各海口有東軍四營准軍六營足資控馭黃河南岸防營亦經節節分布嚴飭認真守護臣統籌緩急審量度支固不敢稍弛武備為 國家惜當用之財亦何可久養冗兵致庫藏有虛糜之費復於東省馬步各營悉心釐剔分別去留所有果毅中左兩營嚴守前營勒字右營振字後營武勝右營共馬步六營均飭就地妥為遣散口糧截至二月三十日止責成營哨各官督令釋伍歸農仍挑留馬勇一百二十名步勇一百名歸併精健營操演克虜伯格林等礮隊以資得力所有留防各營軍為嚴申教令一洗虛憍闊茸之習俾成勁旅再營勇既經裁併綠營應即整理如庫款稍充騰出餉力臣擬抽練數營補強汰弱容再隨時酌度具奏請 旨遵行報聞○己丑雲○諭御史張鴻逵奏請飭補行考試孝廉方正等語著吏部議奏○諭本日引見之降調直隸永平府知府李秉衡著發往山西以知府補用○庚寅以奕劻著鑲紅旗漢軍都統○辛卯廣貴州文武鄉試中額八名○銘安奏奴才自蒞任以來將大股馬賊及時剿滅地方漸就肅清隨即整頓捐辦斗稅清丈荒地收取押租籌畫添設民官講求吏治創辦一切就緒恭維幸蒙 天恩准奴才變通舊例因地制宜一切規模始獲成具是以前歲奏准添設廳縣三處上年復請在省垣添設道府及廳州各缺均已奏邀 聖鑒在案其甯姓等應設各缺現與督辦甯古塔等處事宜太僕寺卿吳大澂會同派員詳細查勘一俟稟報再行奏明辦理第新設各缺建置事宜係

屬創始且政務之繁難地方之瘠苦不特與各省不同即較秦省亦有區別奴才初必請准奏調秦留人
員以供差委補用者其故有二一以古省地處極邊苦寒特甚一經奏調揀發罔不視為畏途望風裹足
即蒙 簡派實缺人員來古補用而人地生疏創辦之初深恐無所措手奏効為難一以舊有同進數員
積習既久雖與更新山各部院筆帖式例揀各員皆係初任吏治未諳一旦與商地方政務本非所知茫
然失措故必與本省差委各員奏留補用者以事體之原委既能周知地方之情形亦多熟悉當可勝任
愉快不致叢脞堪虞其詳細情形亦經歷年隨事奏陳已在 聖明洞鑒之中毋庸煩瀆然而調員亦甚
非易易矣計奴才五六年來陸續所調差委各員其不甚得力不敢遷就者遣撤業已過半得力奏留者
止通判二員知縣一員佐雜各項數員而已古省籌餉維艱委員薪水無多僅敷餬口各該員均能不辭
艱苦勤慎効力即其勞績卓著奴才從未敢破格遷 恩所恃為鼓舞人才者只此奏留補用一途耳其
以名器當慎惜才堪任使與其加以進階於地方無補何如留省補用在該員既沾實惠於地方亦慶得
人其道府兩項歷有賢員尚未奏留者亦未經設缺之故此數年來奴才因地因人酌量用舍之實在情
形也自上年十月後吏部於古省變通章程多有更定奏調奏留概議停止新章所議甚嚴奴才雖艱窘
萬分何敢妄有瀆陳致干咎戾惟奴才忝膺驅寄具有天良辦理地方實無旁貸現既仰蒙 恩旨准奴

才添設民官講求治理諸事未集全局攸關非恃有勤敏穩練熟悉情形任事必以實心論事必顧大局者數員則成事愈難而廢事甚易此又非一官一邑之屬縣各員所能勝任者矣查有差委道顧學熙知府李金鋪自前年由直隸督同李鴻章保奏奉旨發往來古差委奴才即札派該道總理荒務清訟監案各局事務兼充營務翼長該員宅心公正操守謹嚴且年富力強能耐勞苦到古年餘於吏治民生刑名詞訟均能虛衷體察實力整飭凡地方添設大小各官規畫制度皆賴其一手經理實足綜核庶務幅服羣僚上年奏設道缺時已及吏部新章故不敢妄有陳請然將來如有續設邊疆要缺該道熟悉地方情形襄理一切尤為必不可少之員該知府經奴才會同吳大澂奏派庫春屯墾招撫等事該員樸誠勤懇深得民心於鄰邦交涉事宜處置尤屬得體又查有知府用同知余溶隨奴才當差為時最久歷經派充文案翼長及各局務該員才明守潔辭練精勤尤能熟悉刑名通達政體堪勝煩劇表率之任此三員皆奴才倚為左右手者現在吏部新章甫定奏留則格於例遺散則惜其才惟有臚列該員等才具猷為上達宸聽查顧學熙係花翎三品銜直隸候補道李金鋪係花翎三品銜候選知府余溶係花翎分發省分試用同知補缺後以知府用應如何拔擢之處奴才不敢擅擬惟有仰求特旨恩施俾各該員艱苦從事之心益加淬勵而地方一切已辦未盡各事宜咸能依舊經理無須更變就延再奴才亦免虧一

贊之功貽譴強弩之末不致下干吏議上賀 天恩敷才不勝感激屏營迫切荷命之至得 旨顧肇熙

等均著准其留於吉林交銘安差委嗣後遇有相當缺出並准該將軍等酌量奏請補用○壬辰廣賈州
省文武鄉試永遠中額八名○癸巳諭御史洪良品奏考試孝廉方正弊竇甚多請飭嚴行覆試一摺孝
廉方正係朝廷特設之科膺是選者宜如何束身自愛以期名實相符若如所奏竟有品行不端甚至臨
場舞弊殊屬不成事體應如何詳定章程嚴行覆試之處著吏部妥議具奏○諭前因給事中孔憲毅奏
參巡視中城給事中師長灼各款當經諭令都察院堂官查明具奏茲據奏稱師長灼因案得賄及辦事
顛倒任意各節均查無其事惟於伊子師岱及家人等在外招搖結交司坊官說合公事等情未能覺察
並移送案件遞延實難辭咎等語刑科給事中師長灼著交部照例議處刑部候補主事師岱行止不端
物議沸騰著卽革職指揮張得先任意刑訊累及無辜謬妄已極俾該子處尙屬輕縱著卽革職副指揮
高楓與吏目李春榮與張得先同堂訊案聽從濫行亦屬顯預均著交部議處○甲午調章合才爲江南
淮揚鎮總兵朱淮森爲江西九江鎮總兵○飭丁燮在籍陝西候補道周漢迅赴新驛軍營交劉錦棠差
遣委用○以徐占彪爲甘肅巴里坤鎮總兵○頒給天津怡賢親王祠匾額○諭軍機大臣等有人奏長
江水師設有專營院省澄清左右兩營似可裁撤右營管帶官提督蕭奏來在服官省分置辦房產並令

礮船各勇爲之興造房屋且開各營勇丁多有缺額裕祿不思整頓等語著彭玉麟確切查明據實具奏原片著鈔給閱看將此諭令知之○諭劉錦棠奏查明營員互揭請旨革職一摺記名提督巴里坤總兵席大成以專閫大員竟敢私挪兵餉派弁送回原籍實屬違例營私留甘補用總兵巴里坤鎮標中軍遊擊柳臣玖始則任聽席大成私役擅挪旋因席大成以抗公不辦等情稟參輒復列款稟揭並失查稿書私收錢文於兵丁缺額虛懸不補又不按季冊報居心殊屬巧詐席大成柳臣玖著卽一併革職以肅軍政○乙未賜大學士直隸總督李鴻章湖廣總督李瀚章母李氏祭筵一壇○以涂宗瀛爲湖廣總督李寶箴爲湖南巡撫○諭大學士直隸總督李鴻章現丁母憂本應聽其終制以遂孝思惟念李鴻章久任畿疆籌辦一切事宜甚爲繁鉅該督悉心經畫諸臻妥協深資倚任且駐防直隸各營皆其舊部歷年督率訓練用成勁旅近復添練北洋水師規模創始未可遽易生手各國通商事務該督經理有年情形尤爲熟悉朝廷再四思維不得不權宜辦理李鴻章著以大學士署理直隸總督俟孝百日後卽行回任際此時勢多艱該督當以國事爲重勉抑哀思力圖報稱卽以慰伊母教忠之志有厚望焉○丁酉裕祿奏恭奉光緒七年九月初二日 寄諭通政使司副使張緒楷奏河南固始商城與安徽六安霍邱交界處所地方遼闊山深林密最易藏奸民俗强悍伏莽未清請飭擇要布備或分設縣治或移扎專閫以資

控制等語著該撫等體察情形會商具奏原片著鈔給閱看等因欽此仰見 聖主綏靖地方有備無患至意莫名欽服伏查安徽六安霍邱兩境與豫省之商固壤地處處毗連民俗之強悍向以霍邱固始爲最大安商城次之而霍邱之葉家集等處與豫省之葉家武廟等集正當兩省交界居六安商固四邑之中相去州縣治所皆在百數十里暨百里遠近地瀕史河水複岡重尤爲匪徒出沒之所自軍務肅清以後皖省於葉家集一帶派防營扼紮巡緝目前固可無慮如將來防務盡撤則該處距城寫遠民氣驕悍而止設有分司巡檢一員武職亦止有外委一弁汛兵數名稽查難周誠難保其不爲賊奸之藪詳釋原奏所請洵爲善後經久之計惟事關兩省建制必須於因革損益之宜妥細勘籌方期萬全無弊奴才於接奉 諭旨後卽經咨商河南撫臣會勘籌議旋由李鶴年派委河南候補道嚴續奴才亦派委安徽候補道錢祿會同赴皖豫界上逐一查勘據該道會勘兩界地勢情形繪圖摺摺覆奴才與李鶴年往來函商並督同司道悉心體察以地勢而論葉家集最爲皖豫門戶自該集以西六七里外卽屬豫境其六安兩境附近該集地面實在距城遙遠鞭長莫及者霍邱有戚家坂等處二十三保六安則有金家寨等處十二保如議分撥設縣則兩境止三十餘保幅輒太狹不足以成縣治若必割豫省之地以益之則事隸兩省地非一屬既與從前潯陽設縣只在一省者情形不同且古人畫界分疆具有深意兩界居民農

服先購相安日久一旦易其疆里驟事更張誠恐未覩設縣之利先有紛吏之擾揆諸民情亦非所樂從
竊惟該處控制之要本重在彈壓緝捕一事而彈壓緝捕全在有得力之人以收實效其刑名錢穀之謀
於各州縣者定制已久原不慮有貽誤若更設縣治一切翻攤管理不特增設官吏以及添建城垣學校
倉庫監獄等項需費浩繁更恐事多力分轉於緝捕事宜難期得力是設縣一層核之無理似覺窒礙難
行至安省綠營額兵本少詳查通省副多遊及都守各員皆現居要地無可移撥而 國家經費有常亦
未便因此一隅遽增營制查從前皖省甯國府同知移設鳳嶺駐紮澗溪口潁州府同知移紮曙口橋背
以地控邊界移防鎮撫正與該處情形相同今若仍照成案將原設潁州府之糧捕通判移設霍邱之葉
家集原駐葉家集之開順巡檢改駐葉家集七十里之洪家集並將六安原設直隸州州同移設六安
之金家寨所有霍邱境內附近葉家集之戚家販等二十三保卽令該通判帶同現移之洪家集巡檢
專司稽查巡緝其六安境內之金家寨等十二保卽令該州同帶同和尙灘巡檢專司稽查巡緝再於
各營移簡就要抽撥千總一員湊足兵丁百名撥赴葉家集隨同該通判駐紮俾資控制其兩處分撥保
內一切賭博打降私宰等項枷杖案件概照鳳嶺等同知之例併聽該通判州同就近審理其刑名錢穀
事件仍歸各州縣管理遇有竊劫各案除巡檢仍照捕官開參外其通判州同亦各照捕盜屬員暨分防

州同例參緝葉家集距豫境黎家集隔僅三十餘里如豫省吏於黎家集酌設官兵彼此警息相同遇有兩界應辦事宜不難隨時會商籌辦就潁州六安而論駐城有知府牧令等官各移去府佐州佐一員決不致有曠誤而皖豫四邑交界得此專員分駐即可聯絡兩省之氣共籌邊界之防似於地方不無裨益如蒙 俞允該通判並大安州州同均係以原設之缺移紮應仍照舊歸爲部選之缺毋庸另行更定其抽撥弁兵一切未盡事宜應由奴才會商督臣續行奏明辦理至現任通判州同一員是否堪勝移設之任亦當察看據實奏陳不敢稍存遷就下部議奏○己亥諭軍機大臣等有人奏署廣東潮州鎮總兵方燿辦理積案枉殺甚多創立花紅名色勒捐潮屬富戶不下數百萬元半歸私案包庇命案擅受呈詞又廣引其族人分官汛地潮州都司方濫詐擾閭閻有大方小方之目普寧縣屬向有馬耳橋永安鄉二村居民以蓄怨盡被驅戮將馬耳橋村名改爲德安里鄉聚族鬪居該總兵擁資數百萬開設當舖糖行罔利營私請飭查辦等語所奏是否屬實著裕寬確切查明據實具奏毋稍徇隱原摺著鈔給閱看將此諭令知之○庚子諭李鴻章奏濬陳下情仍懇開缺終制一摺情詞懇切覽奏良用惻然朝廷以孝治天下本不忍重違所請強人子以所難惟念李鴻章久任畿疆值此時勢艱難一切措置機宜動關全局實非尋常疆事可比雍正乾隆年間大臣如孫嘉淦朱軾嵇曾筠蔣炳于敏中等皆奉 特旨任守制近今

如會國藩胡林翼亦皆奪情起用李鴻章惟當仰體朝廷不得已之苦衷勉抑哀思仍遵前旨俟穿孝百日後卽回署任毋得再行固辭○辛丑諭總理各國事務衙門奏法越兵端已起亟宜通籌邊備以弭後患一摺據檄張樹聲兩報二月十四五等日突有法國兵船由西貢駛至海陽聲稱攻取東京等語越南孱弱已甚果法人意在併吞該國萬難自全北圻各省與滇粵毗連若法人盡占北圻則藩籬盡撤後患將無窮期惟事體重大應如何策出萬全之處著就現在情形參以該衙門所奏再行通盤籌畫悉心妥議迅速覆奏候旨施行法國意在山富良江通商雲南保勝一帶實扼要之地防務尤緊著劉長佑杜瑞聯懷遵疊次諭旨嚴密防維相機因應以杜窺伺而固邊疆○癸卯諭林肇元奏職員虧欠捐項請革職追繳等語刑部員外郎顏懷珠在四川原籍辦理貴州捐務虧欠捐銀五千七百餘兩延不解繳追經嚴催又復捏詞搪塞希圖支展實屬荒謬顏懷珠著卽行革職並著丁寶楨迅將該革員提解貴州勒令如數追繳以重款項○李鶴年奏准刑部咨議覆御史胡隆洵奏請將盜案仍復舊制分別首從辦理一摺擬將就地正法章程先行停止請飭各省體察情形妥議具奏等因奉 旨依議欽此抄錄原奏咨行到豫當經前撫臣涂宗瀛欽遵行司核議茲據臬司豫山具詳前來臣查同治八年間原任大學士直隸總督曾國藩奏請將各匪餘孽擾害鄉里以及騎馬持械倚強肆掠並游勇聚黨夥劫各案仍照奏定章程

辦理欽奉 上諭山東河南與直隸壤地相連情形相近著各該撫一體辦理欽此又同治十三年間御

史鄧慶麟奏請清省分盜犯請照舊例辦理經前撫臣錢鼎銘以體查情形礙難規復復奏各在案伏查

豫省軍務雖已肅清有年惟臨陳南汝光各屬毗連外省素有匪蹤出沒糾眾搶劫之案時所不免屢經

督前撫臣派撥練軍督同地方文武將著名匪犯擒獲懲辦而逃擒餘孽尚多潛伏搜捕未能淨盡此輩

兇頑成性非嚴法以鎮懾不足戢其浮動器張之氣至河陝汝一帶山徑叢雜尤為西路要衝遊勇劫奪

所在皆有較之尋常盜案不同河北情形亦然若遽改歸舊制解勘深慮輾轉遷延不特解案羈禁疏脫

堪虞且或案犯因病歿死罔在犯法者無以觸目警心難保不相率效尤在被害者方值痛心切齒或

轉以輕縱滋疑時勢所趨有不得不借重典以遏亂萌者惟在慎之而已 臣與臬司再四籌商所有就地

正法章程實難停止擬請嗣後拿獲各匪餘孽以及滋事遊勇並騎馬持械放火殺人等犯仍准於獲訊

後錄供通稟聽候核辦該管道府覆審明確果係兇暴顯著情真罪當恪遵前奉 諭旨就地正法以昭

炯戒此外尋常搶劫盜犯均照向章分別解勘以符定制既不敢輕視人命亦未敢姑息懲奸總期因時

制宜於地方捕務有裨一俟盜風稍息卽當奏請改復舊制以仰副 聖主明慎用刑之至意下刑部知

之○甲辰諭內閣侍讀學士文頌奏請飭申明定例嚴禁頹風一摺紳士干預公事例禁森嚴若如所奏

竟有包攬詞訟顛倒是非及包納錢糧把持墾荒等事殊屬有干禁令著各直省督撫嚴行申禁如有此等刁劣紳士任意妄爲卽著嚴查懲辦至開墾荒地額賦攸關豈容稍有隱匿著澈底清查認真經理以昭核實○諭前因御史葉蔭昉奏河南學政廖懋恆歲試各屬於欠考情形據實覆奏並請旨可否飭部按照湖書吏索費開復各情當諭令李鶴年會奏旋經該撫查明欠考情形據實覆奏並請旨可否飭部按照湖北成案將上平咨革文武各生概予開復業經諭令該部議奏茲據內閣侍讀學士文碩奏等官挾私妄奏撫臣查覆贖徇等語著都察院堂官會同禮部兵部查明具奏○乙巳子故正紅旗蒙古都統皂保祭葬○湖南提督鮑超因病奏請開缺不允子假一月調理○諭軍機大臣等譚鍾麟奏籌度新疆南路情形一摺所請酌度七城廣狹繁簡設立丞倅牧令一員吏於喀什噶爾阿克蘇兩處各設巡道一員如鎮道之例著劉錦棠體察情形會商該督妥議具奏○諭謙福等奏各城差弁運解軍需夾帶商貨所派弁兵爲數過多復加跟役聞有委弁飭傳駕杆車並支食廩羊及差弁赴綏遠城匪途票傳供應不俟查核早經過站等語疊站供應差務向有定章前經嚴禁夾帶力杜浮冒何以仍有前項弊端殊於郵政大有關係著各該城將軍大臣遵照向章嗣後採運一切軍需各差務將物色數目斤重逐細註明核實傳用駝隻所派員弁兵役亦應從減並先期咨照察哈爾都統衙門稽核均不得傳給廩羊委員准帶跟

役一二名亦概不准帶武職實任二品文職實任三品方准坐駕杆車以示限制至各城差赴綏遠城

往返傳站一體遵照辦理仍著察哈爾都統認真稽查通飭所屬各站官妥爲應付不得推諉貽誤各

城差弁倘再有夾帶擾累情弊卽行分別查參懲處○戊申 上詣 奉先殿 壽皇殿行禮○諭御史

俊義奏請整頓官學一摺國家設立八旗官學原以培養人材該教習等宜如何實心督課以期名實相

符若如所奏近來各官學學生並不入學肄業教習助教亦不認真教誨尙復成何事體著國子監

堂官嚴飭各該學教習助教盡心訓誨毋任稍久懈生該堂官務當隨時稽查認真整頓用副朝廷教育

人材至意○諭前因御史陳啟奏湖南剿辦鳳凰苗匪及江華縣痞匪保獎冒濫請飭撤銷當諭令

涂宗瀛查明具奏茲據奏稱查明兩案剿辦情形李明坤原保各員尙無冒濫惟應分別等差以昭核實

現將原保各員擇尤爲出力者酌擬懇請恩施開單呈覽等語卽著照涂宗瀛此次單開各員并給予獎

勵○李鴻章奏臣前由英國訂購新快船兼砲船兩號派記名提督丁汝昌督率員弁出洋駕駛回華上

年十月臣親赴海外驗收專摺奏報並將尤爲出力人員請獎奉 旨允准欽遵在案嗣准吏部咨該員

等自出洋至回華核計未及三年未便援照出使各國異常勞績請獎應另核奏辦等因臣查西洋弁兵

管駕新船來華沿途須實保險重資此次該員等遠越重洋數萬里之外駕駛戰船巨礮回華總稅務司

赫德初尙稟請向洋行保險臣密飭丁汝昌督同員弁格外慎重毋稍再糜保險鉅費西人敢以爲至險至難乃行經地中海紅海印度海南洋風浪險惡異常卒能保護不穩實較出使隨帶人員僅有筆舌之勞而無駕駛保護船廠之責者尤爲難得其艱苦卓絕勞績實未可泯祇以係中國從前未有之事兵船向來未到之境並無定章可循是以請照出使各國一例給獎未便再扣年限轉致向隅且各員中有久在海防積功記獎者今因出洋接帶船廠併案議敘亦不得不稍示優異俾昭激勸所有候補縣丞馬毓藻監生解茂承文章馬元愷附生江永池仲祐等五員原請官階班次翎枝均係論功行賞毫無冒濫合無仰懇 天恩俯念該員等出洋駕駛船廠回華異常勞績 勅部仍遵前奉 諭旨給獎註冊下吏部議奏○庚戌諭軍機大臣等前有旨將唐炯補雲南布政使著丁寶楨傳知該藩司迅速馳赴新任無庸來京請訓並著將起程日期奏聞將此由五百里諭令知之○諭前因李鴻章久任畿疆事煩責重可遽離粵經諭令俟李鴻章百日後卽回署任茲復據奏滇陳愚悃懇收回成命准予開缺終制一摺披覽之餘深爲軫惻在李鴻章陳情固請原爲人子至情而朝廷慮念疆事倚重需人實出於不得已然若仍令照常供職度李鴻章之心終必不安亦非所以示體恤李鴻章著准開大學士署直隸總督之缺仍俟李鴻章百日後駐紮天津督率所部各營認真訓練並署辦理通商事務大臣該大臣既經開缺留營撥

之金革無避之義亦不肯於禮經此係曲鑿其懇切之忱從權酌辦俾得忠孝兩全可無遺憾當亦天下所共諒該大臣其仰體宵旰之勞自念責任之重勉圖報稱宏濟艱難以副厚望並著派車機大臣醫戶部尚書王文韶前往天津劉切宣諭慰憐俾知朕意毋許再行固請○諭駐藏幫辦大臣鄂禮奏病難速愈請開缺調理一摺鄂禮前因修墓患病兩次請假假滿後自應迅速赴任以重職守乃據奏病難就痊遽請開缺殊屬非是若仍責令前往亦難期得力鄂禮著開缺交部議處○賞加崇綱副都統銜作為駐藏幫辦大臣○辛亥諭吏部奏遵議調補知府與例未符聲明請旨一摺福建臺灣府知府員缺著准其以周懋琦調補嗣後不得援以為例○予直隸天津縣烈婦郭張氏旌表○壬子銘安奏奴才於前歲奉准添設賓州廳五常廳教化廳三處復於上年請在省城添設道府及雙城廳伊通州各缺均已奏邀聖鑒在案夫腹地分職設官布置可期周密而邊疆內修外攘治理尤賴賢能查寧古塔瑯春地當衝要為省城東南門戶安輯撫循尤不可緩其三姓地方地廣民頑盜風未息而且寧瑯兩處招撫滿民辦理屯墾三姓亦放閒荒人烟日密政務較煩命盜戶婚仍就理於各城副都統衙門誠恐協佐各官吏治未諳維期整頓竊維自強之計固在講武整軍而求治之原要在安民察吏誠以吏治與防務相為表裏者也今擬在寧古塔城內添設巡道一缺名曰分巡寧姓瑯地方兵備道俾令提綱挈領南北邊要周歷分

巡彼此兼顧以期綏靖地方惟查奉天東邊道充當將軍翼長管理營務並設有道標馬兵二百名步兵五百名作爲兩營均歸巡道親統現在古省餉項支絀若援照奉天章程設立額兵應發餉乾爲數甚鉅經費難籌現擬作權宜之計飭令該道兼充防禦長酌撥防軍數百名作爲該道親兵以備緩急如此辦理既可節省餉需亦可聯絡聲氣實於地方防務均有裨益俟將來裁撤防軍再行奏請添設巡道制兵再甯古塔城內應請添設直隸撫民同知一缺加理事銜管理地方各事宜元代名該處爲合蘭路現在新設同知卽名曰合蘭廳俾春添設知府一缺名曰理春府仿照熱河承德府奉天昌圖府之例仍管地面詞訟錢糧各事三姓添設撫民同知一缺加理事銜名曰三姓廳均歸分巡甯古塔地方兵備道管轄又查塔城東南五百四十餘里之萬鹿溝地方距三岔口僅四十里該處地當要衝必須添設縣治以資佐理當卽札派差委知府李金鏞前往查勘何處可以修城建署飭令繪圖稟覆去後茲據稟稱勘得萬鹿溝地方北山下有平坡一處周圍約八九里中含闊大山水環抱當海參崴赴塔衝途前臨綏芬河後當萬鹿溝口於此處修城建署分設市廛不但可轄該處人民而可進可退戰守亦足兼資至於琿春如何分界之處則三岔口以南有分水大嶺爲限水歸綏芬北屬縣水歸洪溪河北屬琿春界址分明無須再勘等語並繪地圖稟覆前來奴才等詳核該府所稟各節均尙妥協應請在萬鹿溝設立知縣一缺加

理事通判銜名曰綏芬縣卽歸合蘭直隸州民總統屬惟琿春府現無屬縣查敦化縣分防之南岡地方距琿春近亦係衝要之區前歲奏請設立縣丞時曾聲明該處居民僅有四百餘戶只宜設一縣丞分司其事俟數年後體察情形改設正印卽以哈勒巴嶺分界等因一俟將來該處荒地放齊商賈輻輳民戶繁多再行奏請改設縣治卽歸琿春府統屬以符體制現擬在琿春府另設照磨管司獄事一缺合蘭屬三姓廳各設巡檢管司獄事一缺綏芬縣另設巡檢管典史事一缺均係管理監獄惟邊地荒寒村屯較少各該處有一民官足資治理嗣後生聚日繁再行選擇地勢設立分防至教諭訓導各缺亦可毋庸添設各該處文武生童仍照舊赴省考取如將來文風日盛再請另設 類以上添設各缺如蒙 俞允應請 旨鑄造關防印信鈐記迅卽頒發以昭信守其定缺分籌俸廉修城垣建衙署募弁勇設馬撥應行詳議章程謹另繕清單恭呈 御覽並繪具綏芬縣地圖貼咨呈軍機處備查合無仰懇 天恩俯念邊疆緊要亟應設立民官 飭部迅速議覆以便 奴才奉到部文卽行遴選委員奏明接辦試署俟一二年後如果辦理裕如再請實授各官應發俸廉役食勇糧馬撥及建修各項仍請照 奴才前奏照數撥發實銀以重地方而求實濟其餘未盡事宜 奴才當再與督辦齊古塔等處事宜太僕寺卿吳大澂隨時體察情形悉心籌畫妥議具奏恭候 聖裁得 旨該部速議具奏○銘安奏前歲新設之敦化縣擬劃歸

彈春府統屬現查該縣距彈春六百餘里若請隸於該府屬下不惟遞送一切公牘殊覺紆折且審辦重案往返派差解送路遠山多並無旅店難免疏虞尤非慎重之道該處本係吉林驛碼地仍請將敦化縣歸吉林府統屬較爲簡便至此次擬設之三姓屬係屬邊疆要缺原議歸分巡甯姓璵地方兵備道管轄惟由姓至瑤一路本非通衢崇山峻嶺渺無人烟此次雖請添設馬撥一時恐難齊備文報不通不得不爲權宜之計請將三姓屬暫歸分巡古伯阿地方道兼轄俟一二年後該處馬撥設齊民居漸密彼時再請歸分巡甯姓璵地方兵備道管轄以符體制得 旨覽○癸丑兩○乙卯 上諭 太廟行禮○是月德意志國使臣巴爾德赴上海江寧漢口等處由參贊代理使事旋回京

夏四月丙辰朔日有食之○時享 太廟遣奕諒恭代行禮○恩承因病奏請開缺不允予假一月調理○丁巳諭御史鄧承修奏特參步軍統領衙門妾差番役強劫衣冠一摺據稱三月二十八日突有官差數十人持棍闖入鎮平會館稱係步軍統領衙門番役素有密旨拿人立將舉人古銘猷攔毆多傷用大鎖鐵練捉拿入城嚴禁拷打等語步軍統領衙門雖有緝捕盜賊之責何得妄拿無辜况係衣冠士子尤不應擅行毆辱該番役因何鎖拿舉人古銘猷既經嚴禁拷打該衙門堂司各官有無聞見著步軍統領迅卽查明據實具奏毋得迴護掩飾稍涉含混○刑部奏光緒八年二月十六日奉 上諭御史陳啟泰

奏各省盜案就地正法章程流弊甚大請飭停止一摺著刑部彙入各省覆奏御史胡隆洵摺一併妥議具奏欽此又於三月初二日奉 上諭御史謝謙亨奏盜犯就地正法章程請分別有無軍務省分辦理一摺著刑部彙入各省覆奏御史胡隆洵摺一併妥議具奏欽此 臣等查該御史陳啟泰原奏內稱各省覆奏就地正法章程皆以勢難停止爲辭所陳不過謂盜案尙多遞解虞有疏脫省監聚處或恐別滋事端以外無他說也夫未有新章以前何一案不解省何一犯不在監今之視昔情形不相懸絕護解之不便與守之多疏疆吏顧不能區畫周詳反謂勢有阻難遂置 國家成憲於不顧至謂簡便章程之日久驟歸例州縣層層解勘經說難辦盜愈難諱盜必愈甚不知因糧役食原准坐支胥吏陋規尤干例禁何得以此藉口況諱盜之習尙在上司之整頓並不視辦法爲轉移無庸總總慮若遷就新章流弊甚大一案既出但憑州縣稟報將撫卹批飭正法則其中以假作真移甲就乙改輕爲重情事皆所不免蓋地方盜案登時就獲者少多限屆滿緝無期往往別取平民妄拿充數或前案人名竄入後起或尋常案犯陷以重情捏贓教供刑逼誣服但以考成爲念上司各懷瞻徇之私委員會審者不過一公稟銷差道府覆訊者不過空詳塞改案情既結則死者不可復生斷者不可復續覆盆之枉昭雪無從且補錄供招成何信讞按季彙報亦變刑章等 祖制若弁髦視民命爲兒戲若不亟思變計恐致殺戮爲故

常怨憤激成事變從前疑檢未平匪徒讜起自不妨備用重典今海內晏然幾二十年矣百姓相安元氣未復休養生息正在斯時分別首從之例縱未能遽議改舊而就地正法之章何不可先行停止應請飭令仍照舊例解勘分別題奏以重刑憲毋令地方官吏久擅生殺之權庶人命不致草菅等因又查該御史謝謙亨原奏內稱有三牌樓之案例之就地正法之章程一日不停則此一日冤殺吾民者不知凡幾在各省督撫等或先朝勳臣或特旨擢用無不力圖報効懲威同盜匪之害以爲治盜宜嚴而後閭閻可靖然正惟其急於求治而屬員之望風迎合者益教串誣罔以顯其緝捕勘能承審之員又銀鍊周內以附之坦直者輒於信人果決者亟於除盜欲其無誤能乎章程本爲軍務而設仍應分別有無軍務省分核實辦理現在有軍務省分惟甘肅纏回時擾廣西越境剿辦越南土匪應暫緩停止其餘各省辦理邊防海防皆武備之常不得假借防務爲軍務率請暫緩停止等因先後奏奉諭旨著部彙入各省覆奏御史胡隆洵摺一併妥議具奏等因查就地正法章程起於咸豐三年原因各直省土匪嘯聚成羣肆行搶劫故爾權濟一時不爲典要有牧民之責者但令事在得已總應力挽積習規復解勘具題定例以慎刑章而重民命不得藉口遞解疏脫監犯滋事等情率援舊章致令辦理之法常與軍興時漫無區分故臣部於議覆御史胡隆洵摺內聲請飭下各省體察地方情形將強劫案件仍照成例解

由該管上司覆勘分別題奏請旨不得先行正法迅速妥議具奏統由臣部彙核辦理奏准通行各省遵辦在案現在貴州福建浙江甘肅吉林等省能否停止就地正法尙未據覆奏其奉天黑龍江直隸熱河察哈爾綏遠城烏魯木齊山東山西河南陝西四川江蘇湖南湖北安徽廣東廣西江西雲南等省先後覆奏就地正法之處難以停止查現在覆奏各省分直隸構西北臨邊東路濱海時有馬賊海盜勾結爲患張獨多三廳廣袤千數百里匪徒肆行無忌西南爲烏盜出沒之區去年夏間熱河孫振邦等聚至百數十人盤踞圍場狡馬思逞避經擒斬多名匪首迄未就獲奉天稱海疆大定腹地有遺散未盡之游勇從前有漏網未獲之餘匪黑龍江構時有馬賊什伯爲羣陝西稱撫回罔知法紀江湖等會黨羽動至百數人之衆湖南北構遺散勇丁搶劫爲生刀痞哥會層見迭出山西稱口外界連新疆爲馬賊游勇出沒之所上年四月迭有白晝肆掠戕官奪犯重案山東稱西南爲捻幅淵藪東北濱海時有馬賊烏匪出沒安徽省構降衆散處不一而足各處撤勇紛至沓來哥會齋匪等項靡地蔑有廣西省構昔年肇亂之邦獷悍成風漏網巨憝欲圖起事廣東省構結黨拜會任意橫行甚至倚他族爲護符踞山林爲窩宅上年有田冠得等糾衆起旗謀爲不軌四川構嘯匪會匪烏匪實繁有徒加以游勇散練動多勾聚江蘇省構瀕臨江海口岸繁多華洋輻輳奸宄溷迹河南省構陳南汝光各屬逃捻餘孽尙多河陝汝一帶山徑

叢雜游勇劫奪所在皆有河北情形亦然江西省稱教齋土匪焚劫殺人遺散游勇聚衆搶劫之案尙未盡絕雲南省構變亂垂二十年始就肅清外匪內奸時相煽誘風氣所趨尙難驟改貴州等省雖未覆奏到部而與業經覆奏各省壤地相錯情形當不甚相懸在各該督撫將軍身任封圻惟恐姑息養奸致貽地方之患是以懲創此輩不嫌過嚴蓋以除暴方能安良水懦不如火烈之意此次所奏自係實在情形亦且不謀而合如果奉旨允准即可欽遵照辦惟既奉經旨官條奏特旨交臣等妥議臣部爲執法衙門一切均有定例可循未便以一時權宜之計視爲經久不易之常若如各該省所奏盜案尙多礙難規復舊制試問盜風何時方能止息似此年復一年安於簡便致令殺戮之權操之臣下終無規復舊制之時亦殊非慎重人命之道如謂此舉行之已久驟然停止難免若輩不從而生心轉相慶幸是朝廷方慎重刑章而宵小反詭爲得計非特無以昭炯戒且於地方大有關繫卽如東三省爲我朝根本重地廣東四川爲賊盜最多之處此外各省如游勇滋抗及伏莽堪虞亦多未能盡絕誠有如該督撫所奏者然亦宜稍爲變通未便全無區別總在各該督撫慎擇能員於保甲捕務實心經理未必不能淨絕根株臣等公同酌議除甘肅省現有軍務廣西爲昔年肇亂之區且剿辦越南土匪以及各省實係土匪馬賊會匪游勇案情重大並形同叛逆之犯均暫准就地正法仍隨時具奏備錄供咨部查核外其餘尋

常盜案現已解勘具題者仍令照例解勘未經奏明解勘者統予限一年一律規復舊制辦理倘實係距省窳遠地方長途恐有疏虞亦可酌照秋審事例將人犯解赴該管巡道訊明詳由督撫分別題奏不准援就地正法章程先行處決以重憲典而免冤濫得旨如所議行○戊午常雩大祀天於圓丘道

本格恭代行禮○諭溥龐等奏應修各工請派員查驗一摺昭西陵孝東陵裕陵等處均有應行

急修各工著派徐用儀敬謹查勘奏明辦理○庚申諭軍機大臣等慶裕奏法人圖佔越南北圻意在侵軼滇疆請飭預爲籌備一摺法人冀由越南以達滇省覬覦通商之利自在意中該省防務較粵省爲尤要亟應加意綢繆以期有備無患該督撫務當先事防範不得稍涉大意法人如果由保勝窺滇並蓄酌量情形妥籌因應期於固疆圉而杜露漏原摺鈔給閱看將此由四百里諭令知之○辛酉李文敏奏准刑部咨議覆御史胡隆洵奏請將盜案仍照舊例分別首從辦理一摺律以法貴去其太甚事必急所當先欲復情有可原舊例莫若將就地正法章程停止請旨飭下各直省督撫體察情形妥議具奏統俟刑部酌核辦理等因光緒七年閏七月二十五日奉旨依議欽此欽遵咨行到臣溯查咸豐三年欽奉

上諭各直省如有土匪嘯聚成羣肆行搶劫該地方官於捕獲訊明後就地正法至尋常盜案仍著照

例訊辦等因欽此又同治元年欽奉 上諭嗣後各省遣散兵勇如有逗留滋事搶擄民物者即著各地

方官按照軍法立斬梟示等因欽此欽遵辦理在案江西省自軍興以來凡有齋教土匪焚劫殺人以及各營遺散游勇聚眾搶劫之案均係遵照歷奉 諭旨由府道覆訊明確知係情真罪當卽照章就地正法誠以若輩兇悍性成黨與衆多若輾轉提勘非特長途遞解疏脫堪虞吏恐鞫犯傷差橫生枝節且兇徒久稽顯戮亦非辟以正辟之道歷年殄除首要解散從不致滋蔓難圖者實由於此現在雖軍務久已肅清而伏莽尙未盡絕若遽改復舊例深恐凶徒無所懼懼 督同藩臬兩司悉心體察再四籌商目下盜風未能全息竊章實難遽行停止所有江西省土匪游勇搶劫滋事之案擬請仍照舊章由地方官訊供稟報批飭道府覆訊得實卽行就地懲辦以除強暴而安良善一俟盜風全息再請改復舊制倘有賊證未確情罪不符者概飭照例解省勘辦似此寬嚴互用庶於重懲盜匪之中仍寓慎重刑章之意下刑部知之○甲子兩○乙丑予廣壽病假一月以本格格鑲黃旗漢軍都統麟書兼署吏部尙書烏拉嘉崇阿署禮部尙書○陳寶琛奏伏讀光緒七年六月十五日 上諭朝廷進退大臣惟視其能否盡職以爲考核等因欽此大哉 綸言誠治世之良規取才之宏矩也伏見署步軍統領戶部右侍郎崇禮由內務府司員不數年間驟躋卿貳差使絡繹若步軍統領總理各國事務戶部錢法堂皆責大任重之事而崇禮以一身兼之爲崇禮者宜如何感激 降遇勉圖報稱不意其曠職辜 恩一至於此也夫步軍統

領有緝捕盜賊除暴安良之責自崇禮任左翼總兵以來東城地面搶竊公行全無畏忌及其署理提督
莠至如公奕詢府故大學士英桂前都統阜保宅迭出劫竊之案至今賊盜迄未捕獲近讀 諭旨古銘
猷一案乃復縱容番役妄拿無辜辱及土類夫貴近之家尙遭攘奪則民間可知衣冠之士尙遭塗炭則
民間更可知 轅下駭然無不集指且其爲戶部右侍郎於錢法堂事務漫不經心一聽寶泉局監督邵
承瀚所爲近日驗收雲南銅批勒索規費物議沸騰邵承瀚聲名素劣衆所不齒去冬或於崇禮處控其
賈妓爲妾是其行止污下崇禮早已深知乃復委任而阿縱之何耶錢法堂乃右侍郎專責猶且縱弛如
此其於部務亦可概見至於總理各國事務關係尤重顧預若崇禮昏曠若崇禮尙望能折樽俎之衝建
懷柔之策乎外間議論皆謂崇禮識字無多習氣甚重臣誠未敢決其信否惟卽其所居之官考其所行
之事其爲負 國家優擢之 恩也大矣器小而位高則易益力少而任多則見絀當此時事多艱 皇
上勵精求治若不將此等曠玩之員嚴加懲劾其何以勵臣下之忠勤而破流之錮習前此榮祿進用
之驟任使之隆與今日之崇禮正相彷彿及 朝廷察其不賢旋罷其工部尙書及總管內務府差使復
覆步軍統領可見進退人才全憑功過 朝廷原無成心然則如崇禮者若 聖明鑒及豈得姑容 臣職
司獻納於用人得失誠當直陳惟願 皇太后 皇上察明崇禮曠職之咎卽予懲處以儆玩泄 上諭

翰林院侍講學士陳寶琛奏參侍郎崇禮自任左翼總兵及署步軍統領於地面搶竊各案賊盜多未捕獲近復縱容番役妄拿舉人古銘猷辱及士類其在戶部於錢法堂事務漫不經心監督仰承瀾聲名甚劣去冬被人控告崇禮仍復委任阿縱御史鄧承修奏崇禮斷古銘猷一案覆奏欺飾請嚴加懲處翰林院侍講張佩綸奏給事中師長灼龍鍾昏聩此次古銘猷被拿有伊子師岱句結番役劫毆消憤情事應將此案番役盡行送部訊辦各一摺著派大學士會同刑部查明具奏○丙寅臺灣地震○諭李鴻章俟百日假滿後仍遵前旨駐紮天津辦理通商事務○予鑲黃旗滿洲副都統熙拉布祭葬賞銀一千兩○丁卯劉長佑奏請開缺陛見不報○諭通政使司參議嵩溥奏知縣隱匿重案請飭查辦一摺據稱嵩溥縣所屬孫唐兒莊民人孫世才將伊父孫宗德砍傷斃命伊兄係世有往救亦被戮傷身死知縣吳積憲規避處分勒令鄰佑地保私行和息具結完案等語逆倫重案豈容隱匿不報所奏如果屬實亟應從嚴參辦著直隸總督確切查明據實具奏○己巳以曾國荃督兩廣總督○諭軍機大臣等法人圖佔越南已攻破東京又將城池交還南官意殊詭譎恐後用佔據南圻故智修改新約迫越南以必從事機甚為緊要張樹聲所稱中國備兵之策惟有令滇粵防軍守於城外仍以剿辦土匪為名藉圖進步即當乘時合力經營毋落後著廣東兵輪各船應屆期整頓出洋藉壯聲勢前諭劉長佑等增軍備邊該督等諒已

辦有就緒保勝一帶防務最爲緊要所有籌防各軍卽當選派將領統帶進發扼要分布遙爲聲援毋僅作閉關自守之計將此由四百里諭令知之○庚午諭張樹聲奏請派員幫辦水師事宜並請加卿銜以示優異一摺幫辦大員及加賞卿銜向係出自特旨非臣下所得擅請張樹聲所請派翰林院侍講張佩綸赴津幫辦水師事宜仿照吳大澂賞加卿銜之處著毋庸議○銘安奏據阿勒楚喀副都統富和咨稱該處原設有佐領委左翼協領一缺防禦委佐領一缺領催委驍騎校二缺拉林原設防禦委佐領二缺領催委驍騎校一缺分置八旗左右兩翼委署辦公又阿勒楚喀左右兩司原設辦事筆帖式六員因設雙城堡由該二司轉發保衛筆帖式二缺至今並未撥還查喀拉二處原設職官較少遇差往往不敷分派且所設各缺均有管理旗務之責委用之員分位較卑難資鈐束請改實缺以專責成並請添選左右兩司筆帖式二缺以符原額而資辦公等情咨請前來奴才等伏查該副都統所請係爲整頓旗務以專責成起見自應據情奏請合無仰懇 天恩准將阿勒楚喀左翼委協領一缺改爲實缺協領右翼鑲紅旗委佐領一缺改爲實缺佐領左翼鑲白旗委驍騎校一缺改爲實缺驍騎校右翼正紅旗委驍騎校一缺改爲實缺驍騎校拉林左翼鑲白旗右翼鑲藍旗委佐領二缺改爲實缺佐領右翼鑲紅旗委驍騎校一缺改爲實缺驍騎校共改實任協佐校七缺擬請仿照通省八旗武職官員應領俸餉章程計每年共

需實銀三百二十八兩一錢二分五釐至所請添造鐵帖式二缺查雙城堡現已奏請改設協領事務較減前撥筆帖式二缺即可撥還毋庸另行議添所改協佐等缺應領俸銀統歸通省官兵按年應支俸餉項下開支核銷得旨覽○辛未寶廷等奏從前久開工程弊端最多俾有幾成到工之說此次奉命承修西陵工程同秉公查核得悉工程積弊不敢徇隱謹據實奏聞姑就此工論之此工原估實銀八千五百十六兩八錢三分三釐分爲十成每成八百五十一兩六錢八分三釐三毫積習相沿謂八成到工所餘二成承修大臣各分其一所派監督司員共分其一稱爲節省錢其實到工尙不能八成至多不過四成傳說不一雖難詳究大概自勘估修工官員吏役以至戶工二部與修工之所官員吏役人等大半多有規費臣等奉命之後督率司員嚴飭商人核實摺節先取其商人呈交堅固結呈復呈交歷來所謂節省銀二成另外又節省出一成一併呈交外間歷來傳言固難盡信而觀於商人既具堅固結呈復呈交節省銀則原估不無浮冒不問可知承修堂司官既有規費則他處之皆有規費亦不問可知聞歷來承修大臣有收用者有不收者亦有收而不用者收用固非而亦未必有心貪污蓋深知此中積弊不收則徒飽商人亦不能實添入工不如收之預備他年賠修地步其不收者亦未必有益於工程勘估原數本有浮冒早將各規費算在其中果能四成到工已數修造將此添入不過工程外觀少

加整齊斷不能盡數添入工中有利於商無補於國但求自潔而已其收而不用者亦深知此中積弊既不敢收用又恐舉發有礙原估故隨家收下或施粥廠或助善堂亦但求自潔而已更有賜給人以博廉名而險使起第宅暗收其利故凡曾經承修大工之家鮮不棟宇連雲煥然一新者積弊流傳蓋不僅數十年矣然此弊不能專責承修也總因勘估本多浮冒縱使承修不分用亦難禁他人分用而亦不能專責勘估大臣豈無欲求核實者然大員自解核算能有幾人司員吏役種種混明知積弊坐受其欺勘估原留浮費待承修諸人分用承修恐礙原估明知不肯舉發扶同作弊以糜國帑成何政體雖有賢者無如之何故一二謹慎者遇有工程多不開列銜名以自居於無過之地亦但求自潔而已臣等愚見以為防弊不可不嚴而施恩不妨少寬官員吏役監視奔走不無動勞車馬飲食亦有費用不為籌備焉禁侵吞與其贖而盜虛糜何如明給以求核實聞數年前東陵大工程辦理甚善堂司規費皆未收用留備辦公監督監修等皆有薪水公費工程亦較堅固惜未從此明定章程伏乞飭部妥議按工程大小分成酌給勘估修工官員吏役公費修工之所官員吏役亦有隨同照料之責亦可配給公費嗣後勘估務按工程實核不准稍有浮冒如再犯前弊定當從重治罪以前積習相承已久非出一人伏乞天恩概寬勿究此次商人既呈具堅固結呈則所交節省銀當是贏餘之款無庸添入工中徒供中

館所有呈交歷來所謂節省銀二成並另交節省銀一成應交何處收存伏候 命下司員等前隨往開
工費用皆由自備至此次收工往來監視奔走車馬飲食之費皆無所出可否仰懇 天恩酌留加賞以
資辦公出自逾格 鴻施下等未敢擅便此次款項較小撥節無多臣等不願嫌怨據實上陳者非僅爲
節此區區之費實欲爲 國家除此多年積弊也果能釐定章程此後可節無限糜費若仍慮應故事瞻
徇情面弊終難除是在部臣矣 上諭寶廷許應駉奏查悉工程積弊請飭部妥議章程一摺各項工程
勘估承修均應核實豈得稍有浮冒該侍郎等所奏從前辦工情形請查照成案明定章程並此次節省
銀兩應交何處等語著工部議奏○崇綺奏奉省爲根本重地練兵籌餉關繫匪輕必須因時制宜量入
爲出方足以備緩急從前馬賊滋擾歷任將軍奏調各隊添練馬步各軍所需練餉因戶部議令奉省自
行籌款卽經奏請整頓鹽釐貨釐試辦斗秤捐並山海關六成洋稅招商船稅洋藥釐捐一併貼補練餉
光緒六年冬間前任將軍岐元等奏調記名提督蔣月華提督銜降調總兵胡世英等來奉差委並裁減
馬隊營兵添練步隊五營連原練步隊一營共計六營後因裁撤步隊一營及吉林黑龍江馬隊各一百
名以期節省無如練餉來源不旺仍須時費躊躇上年十月間前署將軍恩福奏請撥給的餉摺內已將
支絀情形分別具陳在案奴才到奉後通盤籌畫所有奉省練軍八旗捷勝營及東邊道標各有專款外

其綠營練軍馬隊三營步隊五營吉林黑龍江馬隊並數百練勇共四百二十餘員名每月應需餉銀二萬二千餘兩而近年以所進鹽課黃鹽斗秤捐及六成洋稅招商船稅洋藥懲捐等銀每年不過二十二萬兩核計一年所入實不敷一年所出雖有前存款項一時尚可墊發終非經久之計若不及時裁汰練兵力求撙節勢必難乎爲繼正擬裁撤間據步隊統領胡世英稟請告假回籍奴才因該統領所帶步隊兩營與蔣月華所帶步隊一營中有籍隸湖廣等省各弁兵共四百二十五員名於關外山川道里未能熟悉以之巡緝盜賊勢難得力自應隨同該統領等一律遣撤即將各該弁勇資成胡世英蔣月華由輪船陸路分別帶回妥爲遣散安插均每名發給兩月餉銀俾資就道並派弁兵分起護送出境不准逗遛該統領等原帶步隊共三營其中南省弁勇既經資遣復行汰弱留強歸併兩營另行揀員管帶計實裁去步隊一營每年約省銀二萬六千兩現在奉省練軍馬步隊尙數分布奴才已飭各該將領認真訓練分路會緝以靖地方下部知之○壬申左宗棠奏江淮財賦以鹽課爲大宗淮南北官鹽運銷皖岸兩岸鄂岸湘岸地大利溥浙粵四川長蘆所弗及也乾隆嘉慶年間征剿大小金川蕩平臺灣戡定川楚各匪淮南屢輸巨款時稱極盛厥後憑執根窩坐享厚利執耨相承鮮知營運而饑饉連災道光十一年前督臣陶澍創行票法以救淮北之窮厥別陋規以除淮南之弊從此奏銷正雜各款每歲數百萬始資

敷行後之恪守遺法并擬陸續恢復者惟陸建瀛情時會倉皇有志未逮追髮逆披猖長江梗阻引地過
遭蹂躪金陵被陷鹽法蕩然皖岸靖淮北之鹽兼借銷海濱之鹽鄂借川鹽湘岸西岸兼銷粵鹽浙鹽但
取煩濟民食副地微蓋遘閩准課同治三年金陵克復江路暢行前督臣曾國藩始擬請改行票法維時
垣墮久荒課懸商散官運商運均未能行惟招徠票販試行各岸但期准鹽銷路漸暢不務求贏也按咸
豐元年綱額湘鄂兩岸行六百斤大引官鹽共四十一萬三千四百五十六引同治八年以後祇行二十
七萬二千引咸豐元年皖岸行六百斤大引官鹽共十一萬四千八百五十八引同治三年以後祇行七
萬二千引西岸則被禍較淺准鹽由九江湖口而入銷數照常有加咸豐元年綱額行六百斤大引官鹽
十四萬五千一百二十引商販請領十七萬引現尙有加領引票者臣以行銷溢額暫停未給此外皖岸
鄂岸湘岸則收復已久引額常懸而場垣存鹽日多體素山積海濱之民煮海爲業者皆盼盼終歲無以
爲生而主持鹽政者猶堅持加引無益有損之說漠然不顧商販有以加引請者概予駁斥棄國家二
百餘年一成不易之法如弁髦委沿海數十萬戶一息僅屬之民於溝壑誠不知其何說也議者謂川鹽
借銷鄂湘兩淮爲日已久今改票法行准鹽慮非川中官商所便然四川頻年經營西邊鹽務成效已著
督臣丁寶楨因川鹽銷數日增始擬退還引地兩淮因銷數日減卽收回引地均事理所宜然况前經御

史張擬準周聲澍等奏請增復引額各岸商販又曾以加復引地爲請人情大同已可概見孟子曰雖有智慧不如乘勢管仲亦言俗之所欲因而予之將籌上裕 國課應增准引今時易然無待再計議者又謂湖北賴川鹽以濟軍餉茲復准引必絕川鹽湖北驟失餉源慮非所便不知湖北之利在徵鹽釐從前准鹽引地幾廢川鹽借岸暢銷故賴川鹽之整濟餉假使淮南引地速復川鹽借岸已還湖北釐金不能取之獨者仍可取之准准鹽暢銷則楚賑愈旺於湖北何不利焉况湖北近議撤營節餉養兵之費較前有減無增就本省入款籌之料無不足縱使遇有急需而兩淮鹽釐有餘仍可隨時挹注亦斷無短絀之理從前沈葆楨議准助餉歲可百數十萬兩本是紙上空談但貽畫餅此則取懷而予奏案可感就銷數徵釐終歸實濟爲湖北計與其食借岸之餘曷若協力並規助行准鹽同享正引之利之爲理得心安也臣前於 陛辭時親承 聖訓諄諄以兩江鹽務海防並重受事以來通稽鹽政成案參之僚友規畫旁採紳商議論知裕課便民之道會復岸增引別無可圖而欲復岸增引非詳察商情嚮背與夫利害所在權其輕重合時俗之宜開誠布公行之不可時踰三月略具頭緒謹爲 皇太后 皇上陳之一曰講求鹽質也准鹽約有兩種准北晒鹽藉風日之力而成色白而味佳淮南煎鹽取瀆注鍋燉火煮而成色黯而味微擬北鹽較南鹽利於銷售惟場分無多產鹽不盛不如南鹽產地多而配銷引岸又遠且廣也

川粵之鹽略與淮北相近色味均較淮南爲佳引地之被其侵佔雖山成本之輕亦由鹽質高於淮南之故從來辦理鹽務莫要於緝私而欲私淨官銷莫先於減價誠以價平則銷數自暢也然鹽價雖較私爲減而官鹽色味不如私鹽之佳則其勢不足敵私民食終難舍彼而就此故收回引地從前官商未嘗不意度及之而終不免懷疑自阻者以色味不逮也臣按煮海成鹽既資人力則色味高下自由人力致之訪知場垣存鹽之向稱上色者曰真良正良頂良三種尤貴者重淋一種其色味與淮北無異重淋云者蓋卽收場隨存鹽重加水淋漓出而成者取至驗視色白味佳較川粵所產殆有過之而其價每斤不過增錢一文有奇而已現飭場員垣商儀徵聖驗委員通照重淋一色煎收嚴禁攙和混雜爲正本清潔之計蓋無論能否敵私而講求鹽質裕課便民本鹽政應辦之事也一曰裁減雜款規費也鹽務本腥膻之場自鹽政運司至聖驗分司經歷大使知事文武印委各衙門例有公費外習舉有費供應雜差有費以及挂名差使薪水乾脩凡取之鹽務者併入票本稍算煩鉅日增茲擬善舉有益地方准隨時酌議加增此外應裁者裁應減者減逐日釐定備案嗣後不准別立名色違章取巧以身先之期於共濟庶幾成本可輕而減價敵私之效可覩也一曰緝私宜嚴也私之侵剽岸者川鹽爲大宗其借岸行銷者不必論近由荊州監利而上浸至借岸之外而武漢黃德一帶並受其患矣私之侵洲岸者粵鹽爲大宗其專案行

銷者不必論近越衡永寶三郡之外浸至專岸而長沙各屬並受其患矣此猶下游之患在意中者也其意外之私如浙江岱山所出之晒鹽價極廉而產極旺寧波釣船夾板洋船公然裝載由海口駛入長江插用洋旗不服盤詰內地輪船亦然而直隸福建採辦米糧之船各省差遣來江輪船皆得裝鹽上運非預示阻截徒賣之局卡員弁臨時議禁勢有未能此外來之患也至島匪私中之私票販官中之私難以數計尤為境內之患防不勝防現飭水陸各營沿途巡緝一面張示曉諭先清外來本境官私隱患以塞其源挑選部親軍水陸各一營赴湖北四川交界引地備巡緝之用庶幾同心共助於大局有所裨益也一曰先行官運以導商也收回引地本商販所至願然驟議通行事同創舉商情有未能遵辦者不能不行官運以導其先茲擬遴委委員領五千引運赴湖北荊州借岸由螺山監利漸入試銷所有領運成本銷傳價值均與商販一律辦理略無異意在藉悉運銷出款售鹽入款了然心目然後量其縮定為永遠章程庶幾裕課便民恤商三者兼備並計推行盡利其法乃可大而可久每於接見僚屬士紳時復諮商得其大概而新商販知事在必行行之且有益無損於是領票認引者紛紛而來商人贊全福等呈請增復楚岸十五萬引伊厚坐等請增復皖岸四萬二千八百餘引其湖南之衡州永州寶慶三府屬本淮南引地因屬私使濫別為准引專岸究無准鹽到岸行銷現據商人福慶祥等呈請收還舊額

四萬六千八百餘引其岳州屬平江縣地連楚吳濶險山高淮鹽不到亦稱專岸本地商販頻年運銷破片已一萬引今據新商怡同興等復稟請加領二千引統計蒞任至今時逾三月是皖兩岸新復十九萬二千八百餘引運銷一次課銀約可增十七萬兩有奇鹽原增收約銀一百二十餘萬兩而衡水寶三府請領試行專岸引票平江一縣請加運鹹鹽尚不預爲現在額引領事各岸之續請加引者猶絡繹不絕竊以引票積多恐妨銷路未敢率准應俟此次新加引鹽辦理奏銷後再議徵鹽察看現時商情異常踴躍實爲始願所不及料者加引既行場壩戶口得家業相安藉以養活兵燹遺黎可轉移執事自食其力固在意中而善後諸政得所藉手次第興工尤爲意外之幸也得 旨戶部妥議具奏尋議上以籌復准撥引岸未經商明川楚兩督一切明定章程諸多窒礙格不行○陳寶琛奏本月十五日奉 上諭張樹聲奏請派員幫辦水師事宜並請加卿銜以示優異一摺幫辦大員及賞加卿銜向係出自特旨非臣下所得擅請張樹聲所請派翰林院侍講張佩綸赴津幫辦北洋水師事宜仿照吳大澂賞加卿銜之處著毋庸議欽此仰見 朝廷裁抑疆臣慎重名器之意曷勝欽服 惟近日督撫奏調京員特蒙 降諭申禁日講起居注官職司 言動制同三品視詞臣尤爲清切該署總督賢然請派幫辦水師並欲加卿銜以示優異難以幫辦略諉奏調之名而以從臣下仿道員之例無論體制不符初非優異且於二月間不

得再行奏調翰林等官之 詔旨實相觸背夫編修王文錦志潛修名不甚著張之洞起家詞苑指臂
相請舉爾所知於政體尙無大礙若張佩綸累歲止書言事其才識長短久在 聖明洞鑒之中本無俟
該署督冒昧疏薦上年畿輔興辦水利侍郎孫貽經以該侍講與張之洞均精隸識疆疏請襄辦左宗棠
雖聲明請 旨初未敢擅請派往李鴻章與該侍講素構投契已見於左宗棠疏中然李鴻章議創水師
亦未敢遽請該侍講幫辦誠以張佩綸既屬侍從之臣又有論忠之職固非大臣所可薦揚疆吏所得引
辟也 臣與張佩綸同多講幄其濬於榮利 臣所深知而講求時事見理明決迥非 臣之所及際此時局多
艱實願該侍講久居內職遇事殫誠竭慮以備 採擇若張樹聲之見該侍講條陳水師卽令幫辦水師
雖云事屬因公而僅窺一隅所見已小且究其弊必至使建言者避干進之嫌而不復敢抒憂時之論此
固疆吏之所甚便而非 朝廷之所樂聞也伏考嘉慶七年署直隸總督熊枚請隨帶御史費錫章幫辦
事務曾奉 諭旨責其冒昧因 通諭嗣後如有違例陳請者卽當交部議處今請官御史胥有言責擅
請幫辦冒昧正同應請 旨將張樹聲交部議處以爲違例陳請者戒 上諭前據張樹聲奏調翰林院
侍講張佩綸幫辦北洋水師事宜當以該督擅行奏調未允所請茲據翰林院侍講學士陳寶琛奏張樹
聲擅調近臣實屬冒昧請照例議處等語張樹聲著交部議處○癸酉福建地震○諭本日軍政引見年

至六十五歲以上之正藍旗護軍參領松福圓委護軍參領雙德均著以原品休致○諭徐用儀奏
遵查專案工程請有辦理一摺所有 孝陵東配殿工程著派本年承修另案工程之大臣瑞聯卞世長
敬謹承修○與巴西國互換條約○予江蘇溧陽縣節婦許宋氏旌表○甲戌致仕大學士全慶卒予祭
葬贈太子太保銜入祀賢良祠子吏部郎中麟祥賞加四品銜○奕謨奏從前禁門巡查本極嚴肅奴才
自咸豐五年蒙 恩上書房讀書每於午刻散直出東華門見彼時值班護軍等盤詰呵禁均尚認真從
未見有便服科頭擅行出入者亦未聞有開設烟館賭局之事近今十數年來漸形懈弛至於今而已極
雖屢奉 諭旨嚴禁未能實力奉行以致巨案迭出實屬不成事體前次欽奉 懿旨命醇親王等會議
章程添派弁兵協同巡緝所定章程固已十分周備現今奴才荷承 恩命拱衛 宸垣稽查周防重任
甚重自應懍遵 諭旨會同各營統領暨內務府大臣神機營弁兵和衷共濟力籌整頓以期風清 禁
嚴上慰 聖懷合無仰懇 天恩明降 諭旨飭下前鋒護軍統領等督率所屬認真稽查嗣後各該他
坦公所如有容留閒人招聚烟賭者刻即嚴拿懲辦至禁門重地必須實力稽查其焚燬春華兩門密邇
皇宮尤宜嚴肅嗣後如有閒雜人等便衣小帽攜帶私人不服攔阻無論是否官員指稱何處當差概
行捆拿交該管官治罪庶弊絕風清人知畏法而守衛可期嚴密矣 上諭奕謨奏請申明門禁力籌整

頓等語京城稽察章程前經欽奉 懿旨嚴中禁令該管大臣等自當永遠遵守實力奉行嗣後各他坦公所如仍有容留烟賭情事定即從重治罪不少寬貸至宮禁各門尤宜嚴肅著該管大臣隨時認真稽查如有便衣小帽攜帶私人不嚴攔阻等情即行嚴拿懲辦不准稍有縱弛○乙亥翁同龢等奏三月二十四日內閣奉 上諭御史俊又奏請整頓官學生一摺國家設立八旗官學原以培養人才該教習宜如何安心督課以期名實相符若如所奏近來各官學生並不入學肄業教習助教亦不認真教誨督責尙復成何事體著國子監堂官嚴飭各該學教習助教盡心訓誨毋任積久懈生該堂官務當隨時稽查認真整頓用副朝廷教育人材至意欽此跪讀之下欽悚莫名伏查各項官學建自 國初教養兼施法以意美八旗官學專隸 監辦理當時立法亦極周詳近年以來漸形懈弛推原其故約有數端一則曰膏火短絀一則曰旁廡傾頽天齋火者士子讀書之資也自兵餉減成而膏火亦遂折扣該生每月應得銀一兩五錢按現在章程實不過九錢以九錢之銀餽粥且不能裕安能市書籍紙筆以從事於學乎同治十二年 監奏准擇學生中材堪造就者酌加獎勵然籌款無多究不足以資津貼此膏火短絀之實在情形也官學之殿原係撥給官房或二十餘間或三十餘間大率以足容百人爲度講堂學會粗具規模無如年久失修牆屋遂多頹廢同治十年 監因雨水過多官學坍塌迭次咨報各旗及時修葺旋因

工程浩大一概緩修現在廡廡蕭條上兩旁風益復不堪棲止此房屋傾頽之實在情形也夫學生既無讀書之所則教習難以責成教習既無任學之時則助教何從督率中等職司教士未嘗不日夕圖維然僅能於學生挑缺時某公去取教習教課時認真查驗至於肄業無資橫經無地斷非空言所能獎勵抑豈微力所能振興上等悉心商酌以爲事宜因時以制宜法必變通以盡利擬請仿照各旗義學之制先立數齋俾生徒得以居處並請飭部將應修處所確實勘估擇要繕定不必統加修整至官學生中分別到學不到學兩項世家子弟有力從師者於挑補後不必責令到學准其在家讀書祇予出身不給膏火卽以所裁膏火勻給到學生徒作爲津貼仍請飭部另籌獎賞之款以期鼓舞奮興如此量爲變通尙不至過於繁費至教習等如何責成學生如何核實等再行詳議章程奏明辦理上諭國子監奏陳明八旗官學情形酌擬變通辦理一摺著該部議奏○岑毓英奏閩省請次人員仍形擁擠請展停分發二年下吏部議奏○錫珍奏閩治首在用人而作人必由學校我朝滿漢並用內外文武諸人孔多合十八省漢人所服之官八旗與之同其員而其事我祖宗深知其難於是廣設官學加意訓迪二百餘年人材輩出指不勝屈良由上之教澤深下之學業廣也降至今日統觀中外幹濟之才未必盡無而以視從前則自不逮一夫八旗生齒之繁與朝廷振拔之亟皆非有減於昔也何以今不逮昔

遂相倍從靜言思之其故有二一曰學校不修查八旗官學建自 國初選學生設教習給膏火予升階
訓課精嚴法良意美今則奉行故事百弊叢生各旗學會傾圮殆盡多年不修教習僅備員額不開實授
生徒學生挑選強半假冒官學之虛名僅存轉不若私設義學之得收實效 國家造士之美意幾等於
告朔之餼羊此今不逮昔者一也一曰仕途太廣查八旗仕進除科目廩生世職外其由清漢文武入仕
之途寬於漢員數倍寬則易易則坐歷階資孰肯攻苦卽如捐納筆帖式入資無多易於措辦往往年未
及冠卽出當差從此束書不讀而異日之保送御史薦列京察內則京堂外則道府率由此出此今不逮
昔者二也夫前言往行非書何以傳不學則立身何所式文物典章非學無以識不學則掌故何由知卽
簿書檔案爲服官所必需不學則何以解於心而應於手一旦治繁理劇京官則恃有書吏外官則恃有
幕友方自謂其得計而不知官聲之壞弊端之多盡由於此繼之人材之乏至今已極若不亟爲培養竊
恐學日廢教日壞異時更有求如今日不可得者恭讀上年十月二十日 諭旨有今日之道府卽異日
之藩臬亦卽將來之督撫道府半屬平庸則封疆兩司將有乏材之患又本年三月二十四日奉 上諭
御史俊又奏請整頓官學一摺等因欽此是人材之宜講學校之應修皆在 聖明洞鑒之中然非盡除
積弊力破虛文不能獲真材而收實效今欲實事求是莫先於修復學會慎選教習甄別學生然後取菽

時之規模斟酌損益實力舉行使教者真教學者真學爲清源正本之始基再於旗員入仕之初明定章程嚴加考核除本由考試得官者不計外其餘但就文職皆令考於官學或滿或漢務須文理通順方許服官如此庶得弊漸除才漸出吏治可期蒸蒸日上查八旗官學向歸國子監管理從前之廢弛未必不因耳目難周不能兼顧今議重修事同創始舉凡興工作器款項用人員議章程諸大端責重事煩斷非監臣所能獨任請 飭下吏部將在京之進士出身滿漢大員開具銜名全單請 旨簡派按八旗每旗一人作爲管學專員一切學務悉歸經理卽於 派定之後先令該大臣等將一切規模會同吏部國子監堂官悉心妥議奏明舉辦 上諭侍郎那錫珍奏請簡派大員整頓八旗學校一摺著吏部會同國子監妥議具奏○丙子諭理藩院奏遵議呼圖克圖開導番族出力獎叙一摺嘉木樨呼圖克圖於查辦番族種案之時切爲開導俾番衆傾心嚮化實屬深明大義志向可嘉加恩著賞給廣濟禪師名號以示優異○陳士杰奏浙省地方鹽務候補試用人員壅滯甚請一併停止分發三年下吏部議奏○庚辰以職教署員藍旗蒙古都統寶廷爲正黃旗蒙古副都統○辛巳諭刑部奏請飭拿要犯一摺旨領蒙古郵費一案經刑部傳訊理藩院書吏高棟等供出高紹周卽高振亭係理藩院滿檔房已滿經承並據已革佐領崇恩及領催崇林各供與高振亭認識囑託及借用銀兩等情高振亭爲此案要犯何以日久未獲著

理藩院迅將高振亭設法拿獲送部並著步軍統領衙門順天府五城御史懷遵前有督飭所屬認真緝緝務獲歸案究辦○壬午諭軍機大臣等前據左宗棠奏准鹽擬加引票當以增引恐致滯銷諭令詳議具奏候旨遵行旋據左宗棠奏籌復楚岸派員辦理官運撥營前往巡緝及淮北加引各情已諭令戶部妥議具奏茲據彭祖賢奏兩淮議禁濟楚川鹽有關鄂省餉源客軍緝私窒礙難行請飭暫循舊章各摺片據稱鄂省出款半取給於川鹽釐稅若禁川復准則餉源大減此時未與四川議定停運限期先行設卡堵截恐無以取信於民恩施等州縣例應行銷川鹽不能概行禁絕監利縣已到川鹽限三箇月銷盡窒礙殊多等語川鹽濟楚行之已久此時議復准引固為規復舊制起見惟川鹽能否即行停運鄂省餉源有無關係必須通盤籌畫從長計議且將來如果復准亦必須酌定期限曉諭商民行之以漸方不至激生事端此事惟視民生國計所宜或准或川朝廷並無成見總須妥慎辦理以期商民相安著左宗棠徐宗瀛丁寶楨彭祖賢悉心會商妥議具奏候旨遵行現在仍著循舊辦理川鹽行銷楚岸尚未能剋期禁止遽派勇營前往恐致民間疑懼著左宗棠飭所派親軍二營暫行停止赴鄂將此由五百里各諭令知之○子故布政使銜原任兩廣鹽運使段起戰功事蹟交國史館立傳並准於立功地方建祠○楊啟照奏據運河道穆特布稟稱運河兩岸堤工為東水行漕練纜要道上年秋間連次大雨各路山泉坡水

及汶泗各河同時並漲匯注入運河內水深積長至一丈七八尺勢難容納風狂浪益人力難施致魚鱗
二汛兩岸堤埝均被衝塌缺並冲刷缺口多處亟應一律修築以資濟運督辦估計共需銀二萬
五千兩請察核飭辦等情臣因需款較鉅籌撥不易當咨商山東撫臣各派委員前往會勘減估去後茲
據該委員等會稟先後馳抵魚鱗工次會同運河總辦段履勘緣運堤切近河身漫決水勢排山倒海而
來實難抵禦以致堤岸全被衝壞現在西岸缺口七處已由道籌款發糧堵築完竣東岸缺口十四處亦
已設法挪墊一律堵閉以通漕道至兩岸殘缺堤工段落互長情形節節緊要若不趕為修築恐一經汛
漲全行衝漫阻滯漕行殊於大局有礙籌撥至再於無可核減之中切實刪剔修至新店閣下止共估銀
一萬五千六百七十五兩七錢五分四毫較原估節省銀九千餘兩稟請另案奏撥工價前來臣詳加覆
核委係至緊至要亟應辦理之工所估銀兩亦無浮多惟有仰懇 天恩俯念運道緊要准由山東藩庫
籌撥銀一萬五千六百七十五兩零發交運河道督廳迅速集夫興辦以固堤防洵於運務有裨得 旨
如所請行○癸未子廣東潮陽營歷次奏調陣亡官兵於潮陽建祠○色楞額奏廟衛喀裏使噴窠等處
抵前藏及起程回國日期報聞○甲申諭軍機大臣等禮部奏接准朝鮮國王咨文請飭會贖一摺據稱
該國請於已開口岸互相交易等語朝鮮久列藩封典禮所關一切均有定制惟商民貨物不准在各處

私相交易現在各國既已通商自應准予變通准其一體互相貿易應如何詳定章程之處著張樹聲函商李鴻章妥議具奏此後該國貿易事宜應由總理各國事務衙門覈辦其朝貢陳奏等事仍照向例由禮部辦理尋訂中國朝鮮商民水陸貿易章程八條一嗣後由北洋大臣札派商務委員前往駐紮朝鮮已開口岸專為照料本國商民該員與朝鮮官員往來均屬平行優待如禮如過有重大事件未便與朝鮮官員擅自定議則詳請北洋大臣咨照朝鮮國王轉札其政府籌辦朝鮮國王亦遣派大員駐紮天津分派他員至中國已開口岸充當商務委員該員與道府州縣等地方官往來亦以平行相待如過有疑難事件聽其由駐京大員詳請南北洋大臣定奪兩國商務委員應用經費均歸自備不得私索供億若此等官員執意任性辦事不合則由北洋大臣與朝鮮國王彼此知會立即撤回一中國商民在朝鮮口岸如有自行控告應歸中國商務委員審斷此外財產罪犯等案如朝鮮人民為原告中國人民為被告則應由中國商務委員追拏審斷如中國人民為原告朝鮮人民為被告則應由朝鮮官員將被告罪犯交出會同中國商務委員按律審斷至朝鮮商民在中國已開口岸所有一切財產罪犯等案無論被告原告為何國人民悉由中國地方官按律審斷並知照朝鮮委員備案如所斷案件朝鮮人民未服許由該國商務委員稟請大憲復訊以昭平允凡朝鮮人民在其本國至中國商務委員處或在中國至各地

方官處控告中國人民各色衙役人等不得私索絲毫規費違者查出將該管官從嚴懲辦若兩國人民或在本國或在彼此通商口岸有犯本國律禁私逃在彼此地界者各地方官一經彼此商務委員知照即設法拿交該近商務委員押歸本國懲辦惟於途中止可拘禁不得陵虐一兩國商船駛入彼此通商口岸交易所有卸載貨物與一切海關納稅則例悉照兩國已定章程辦理備在彼此海濱遭風擱淺可隨處收泊購買食物修理船隻一切經費均歸船主自備地方官第妥爲照料如船隻破壞地方官當設法救護將船內客商水手人等送交就近口岸彼此商務委員轉送回國可省前此互相護送之費若兩國商船於遭風觸損需修外濤往未開口岸貿易者查察船貨入官惟朝鮮平安黃河道與山東奉天等省濱海地方聽兩國漁船往來捕魚並就岸購買食物甜水不得私以貨物貿易違者船貨入官其於所在地方有犯法等事即由該地方官拿交就近商務委員按第二條懲辦至彼此漁船應徵魚稅俟遵行兩年後再行會議酌定一兩國商民前往彼此已開口岸貿易如安分守法准其租地賃房建屋所有土產與非干例禁之貨均許交易除進出貨物應納貨稅船鈔悉照彼此海關通行章程完納外其有欲將土貨由此口運往彼口者於已納出口稅外仍於進口時驗單完納出口稅之半朝鮮商民除在北京例准交易與中國商民准入朝鮮楊花津漢城開設行棧外不准將各色貨物運入內地坐肆售賣如

兩國商民欲入內地採辦土貨應稟請彼此商務委員與地方官會銜給予執照填明採辦處所車馬船隻聽該商自雇仍照納沿途應完釐稅如有彼此入內地游歷者應稟請商務委員與地方官會銜給予執照然後前往其於沿途地方有犯法等事統由地方官押交就近通商口岸照第二條懲辦途中止可拘禁不得陵虐一向來兩國邊界如義州會寬慶源等處例有互市統由山官員主持每多礙礙茲定於鴨綠江對岸柵門與義州二處又圖們江對岸琿春與會寬二處聽邊民隨時往來交易兩國第於彼此開市之處設立關卡稽查匪類徵收稅課其所徵稅則無論出入口貨除紅蔘外概行值自抽五從前僅章館屬糧運送等費悉予罷除至邊民錢財罪犯等案仍由彼此地方官按照定律辦理其一切詳細章程應俟北洋大臣與朝鮮國王派員至該處踏勘會商稟請奏定一兩國驛道向由柵門陸路往來所有供億煩費現在海禁已開自應就便聽由海道來往惟朝鮮現無兵商輪船可由朝鮮國王商請北洋大臣暫派商局輪船每月定期往返一次由朝鮮政府協貼船費若干此外中國兵船往朝鮮海濱游弋並駛泊各處港口以資捍衛地方官所有供應一切除至辦辦糧物經費均由兵船自備該兵船自營需官以下均朝鮮地方官俱屬平行優禮相待水手上岸由兵船官員嚴加約束不准稍有騷擾滋事一此次所定貿易章程姑從簡約兩國官民均須就已載者一體恪遵以後有須增損之處應隨時由北

洋大臣與朝鮮國王咨商妥籌請旨定奪施行○准湖南提督鮑超展假三月回籍就醫○予湖北嘉魚縣貞女張氏旌表○乙酉諭前據御史徐克剛奏參裕祿信任劣幕及屬員煽紅軍需銷款濫薦保薦各節當諭令孫毓汶查明具奏茲據孫毓汶奏迭款查明均無其事即著毋庸置議已革道員裕庚辦理局務致招物議著裕祿卽行飭令回旗不准違迕